

Uunga siunnersuut:**Inuit innarluutillit tapersorsorneqarnissaannut Inatsisartut inatsisaat****Kapitali 1***Siunertaq, nassuiaatit, sullinniakkallu**Siunertaq*

§ 1. Inatsit manna naapertorlugu inunnut timikkut tarnikkulluunniit pisinnaasakinnerulersimasunut tapersersuisarnissami inuit innarluutillit tamarmik allat assigalugit inuttut pisinnaatitaaffinnik tunngaviusumillu kiffaanngissuseqarnissamut pisinnaatitaaffinnik tamakkiisumik pissarsisarnissaannut siuarsaanissaq, kiisalu inuit innarluutillit pissusissamisut ittumik ataqqineqarnissaasa naleqartinneqarnissaasalu tassuunakkut ersarissarneqarnissaat siunertaavoq.

Imm. 2. Inuk innarluutilik pineqartoq ataqatigiisumik tamakkiisumillu isiginnilluni suliniuteqarfigineqassaaq, suliniuteqarnermilu inuup pisariaqartitaanut naapertuutissapput. Inunnut ataasiakkaanut periarfissaappat, inuup ineriartorsinnaanissamik aamma pisinnaasai naapertorlugit periarfissaqarfiinik atorluaasinnaanissamik siunertalimmik tapersersuineq tunniunneqassaaq. Tapersersuineq inuup innarluutillip maannakkut pisinnaasakkut killiffimminik attassiinnarsinnaanissaanik imaluunniit pisinnaasaata appasinnerulernissaata annikillisinnissaanik, taamatuttaaq taarsiissutitigut, isumassorneqarnikkut aamma paaqutarineqarnikkut, tapersorsorneqarnissaanik siunertaqarfiussaaq.

Imm. 3. Inunnut innarluutilinnut suliniuteqarnermi:

- 1) inuit innarluutillit siunnersuineramik tapersersuinermillu neqeroorfiginissaat qulakkeerneqassaaq,
 - 2) piareersarneqassaaq siusissuklut ataqatigiisumik suliniutitut, inummut unammilligassat ajornerulersinnaanerisa pinaveersaartinneqarnissaat anguniarlugu,
 - 3) inuit ataasiakkaat nukissaminnik pigisaqaannarnissaasa, nammineernerulernissaanut siuarsaanissamut periarfissai tapersorsorneqassapput kiisalu inuup pineqartup inuuniarnikkut inuttullu pisinnaasai pitsanngorsaaffigineqassapput,
 - 4) inuup pineqartup akornuteqarnani inuuniarnissaanut periarfissai atassuteqarfigineratigut, katerisimaaqataanissamik neqeroorfigineratigut, sammisassaqartinneqarneratigut, katsorsarneqarneratigut isumassorneqarneqarneratigullu pitsanngorsarneqassapput,
 - 5) inuiaqatigiinnut akuulernissaq siuarsaaffigineqassaaq, soorlu inuup pineqartup ilinniarnermut inuttullu attaveqarfinnut peqataasarnissaanut periarfissai annertusaaqataaffigalugit,
 - 6) inuit innarluutillit suliffeqarfimmut isernissaannut suliinnarnissaannullu tapersorsorneqassapput,
- aamma

7) inuup pineqartup nammineerluni inigisaani, matumani najugaqarfissatut neqeroorummi, immikkut pisariaqartitai malillugit neqeroorutiniq naleqqussaalluni tamakkiisumik tapersersuinerimik qulakkeerinnittoqassaaq.

Nassuiaatit

§ 2. Uani Inatsisartut inatsisaanni uku ima paasineqassapput:

- 1) Inuit innarluutillit: Inuit timikkut, tarnikkut, silassorissutsikkut imaluunniit imaluunniit maluginiuteqassutsikkut ataavartumik pisinnaanikinnerulersimasut, akornutit assigiinngitsut sunniivigeqatigiinnerisigut, inuiaqatigiinni allat assigalugit tamakkiisumik sunniuteqarluartumillu peqataanissamut akimmiffeqalersimasut.
- 2) Ikorfartorti: tassaavoq inunnik innarluutilinnik ikorfartuisoq isumaginninnermi inunnik innarluutilinnik suliaassaqarfinni sukumiisumik ilisimasalik misilittagalillu kiisalu Naalakkersuisut ikorfartortitut pikkorissarnissamik neqeroorutaannik naammassinnissimasoq.
- 3) Najugaqarfissatut neqeroorut: Najugaqatigiiffiit, najugaqarfiit nakkutigineqartut aamma ulloq unnuarlu neqeroorutit.
- 4) Najugaqatigiiffik inunnut innarluutilinnut arlalinnut ulluunerani ikiorneqarnissamik neqeroorfigineqartussanut najugaqarfissatut neqeroorutaavoq.
- 5) Ulloq unnuarlu neqeroorut isumannaallisagaq tassaavoq ulloq unnuarlu neqeroorut imaluunniit ulloq unnuarlu neqeroorummi immikkoortortaqaqfik parnaaqqajuarneqarsinnaatitaasunik silarlermi matulik aamma igalaalik.
- 6) Najugaqarfik: kommunimi angerlarsimaffigisami illoqarfik imaluunniit nunaqarfik, inuup innarluutillip najugaqarfigisaa.
- 7) Malitseqartitsisarneq: inuusuttut 18-init 23-nut ukiullit inersimasunngornermut ikaarsaariarnissaannut kiisalu namminerisamik inersimasutut inuuneqalernissamut piareersarneqarnerat.
- 8) Kinguaassiuutitigut kannguttaatsuliorfigitinneq: Inuk atoqatigiinnermut akuutinneqarpat, inuup ukiui imaluunniit paasinnissinnaassusaa pissutigalugit tamanna paasilluanngikkuniuk kingunerisinnaasaalu takorloorsinnaanngikkunigit, taamaalillunilu tamatumunnga akuersisinnaanngippat.
- 9) Akuersissut: Nammineq piumassutsimik paasititsilluni aalajangersimasumillu piumasamik ersersitsineq, tamatumani inuup iliuuserineqartumut akuersinera.

Sullinniarneqartut

§ 3. Inatsisartut inatsisaat manna inunnut innarluutilinnut Kalaallit Nunaanni najugalinnut ukiui apeqqutaatinnagit, ukiumikkut patsiseqartumik pisinnaasakinnerusunut utoqqaallu angerlarsimaffiini najugalinnut atuuppoq.

Imm. 2. Inatsisartut inatsisaat aammattaaq inunnut innarluutilinnut atuuppoq, Kalaallit Nunaanni isumaginninnermut oqartussat aalajangiinerisigut Kalaallit Nunaata avataani inissinneqartunut, tak. § 57, imm.2 imaluunni § 59, imm.1.

§ 4. Kommunalbestyrelsip qulakkiissavaa meeqqamut innarluutilimmut Inatsisartut inatsisaat manna naapertorlugu aallartinneqartunik tapersersuinnermik meeqqamut pineqartumut inatsisit allat naapertorlugit aallartinneqartunik suliniuteqartunik ataqatigiissaarineq.

Kapitali 2

Akisussaaffik aamma aqqissugaaneq

Kommunalbestyrelsip pisussaaffii

§ 5. Kommunalbestyrelsip inunnut innarluutilinnut namminersorsinnaassutsimik attassiinnarnissamut imaluunniit annertusarneqarnissaanut kiisalu inuup inuiaqatigiinni peqataanermi, inuttullu pisinnaasaasa pitsanngorsarneqarnissaannut piginnaasanik ineriartortitsinissamut tapersersuinissamik, isumassuinissamik, sungiusarnissamik ikiuinissamillu neqerooruteqassaaq.

§ 6. Kommunalbestyrelsip inunnut innarluutilinnut aamma inuit innarluutillit qanigisaannut siunnersuisarlunilu ilitersuisassaaq.

Imm. 2. Imm. 1 naapertorlugu siunnersuineq ilitersuinerlu ilaatigut imatut ingerlanneqarsinnaavoq:

- 1) Tarnikkut ikiorsiisartumik oqaloqateqartitsinikkut.
- 2) Ikiuutitik toqqaanissamut siunnersuinikkut.
- 3) Ikiuutit atornissaannut ilitersuinikkut.
- 4) Allatigut siunnersuinikkut ilitersuinikkullu.

§ 7. Kommunalbestyrelsip kommunip nalinginnaasumik pinaveersaartitsiffiusumillu suliaqarnera aamma immikkut pisariaqartitsisunut tapersersorneqarnissamik anguniagaqarfiusumik suliniuteqarnerata ataqatigiinnissaat qulakkiissavaa suliniutissamik iliuuseqarnikkut.

Imm. 2. Kommunalbestyrelsip siusissukkut pinaveersaartitsiffiusumik suliniuteqarnermi ilaatillugu qulakkiissavaa angajoqqaatut oqartussaassusillit meeqqanut pineqartunut, angajoqqaatut oqartussaassusillit imaluunniit meeqqat innarluuteqarpata, ilaqutariinni ajornartorsiutit aaqqiivigineqarnissaannut ilaqutariinnut tunngasunik siunnersorneqarsinnaanissaat. Kommunalbestyrelsip ujartuilluni sulinermigut taamatut siunnersuisarnermik kikkunnut tamanut pissutsit immikkut ittut pissutigalugit pisariaqartitsisutut ilimagineqartunut neqerooruteqarnissani pisussaaffigaa. Siunnersuineq

pillugu neqeroorut aammattaaq angajoqqaatut oqartussaassusilinngortussanut atuuppoq, angajoqqaatut oqartussaassusilinngortussat arlaat imaluunniit tamarmik innarluuteqarpata imaluunniit innarluutilimmik meerartaarnissartik utaqqippassuk. Angajoqqaatut oqartussaassusillit kiisalu meeqqat, inuusuttut inersimasullu siunnersorneqarnissamik kisimiillutik ujartuiniartut kinaassusertik isertuullugu aammalu neqeroorutitut ammasutut taamatut siunnersorneqarsinnaassapput.

Imm. 3. Kommunalbestyrelse imm. 4, nr. 1-4 naapertorlugu tapersersuineri inuup ilaqutariilluunniit pisariaqartitaat iliuuseqarfigneqarsinnaasutut nalilerneqarpat inummut immikkut tapersersorneqarnissamik pisariaqartitsisumut ilaqutariinnulluunniit pinaveersaartitsilluni iliuuseqarnikkut neqerooruteqassaaq.

Imm. 4. Kommunalbestyrelse iliuutsinik pinaveersaartitsiffiusunik ukuninnga neqerooruteqarsinnaavoq:

- 1) Siunnersortimik ikiorneqarneq, tassunga ilanngullugit iliuutsit ilaqutariinnut tunngasut.
- 2) Attaveqatigiittarfiit imaluunniit oqaloqatigiittarfiit
- 3) Ilaqutariit pilersaarusiornissaannut siunnersuineq.
- 4) Suliniutit allat inuup ilaqutariilluunniit ajornartorsiuteqalersinnaanerannik pinaveersaartitsinissamik siunertaqarfiusut.

§ 8. Inuit innarluutillit pisariaqartumik tapersersorneqarnissaat aamma innarluutilinnut Inatsisartut inatsisaat una malillugu tapersersuinissamut periarfissanik pisariaqartunik peqarnissaa kommunalbestyrelsip isumagissavaa.

Tapersersorneqarnissamut pisinnaatitaaffik

§ 9. Inuk innarluutilik taamaaliortoqarsinnaappat nammineerluni inigisassamik toqqaasinnaanermut tapersersorneqarsinnaatitaavoq. Innarluutilik aamma inuk innarluutilimmut angajoqqaatut oqartussaassusillit immaqalu akisussaatitaasoq tamanna pillugu kissaateqarlutik oqaatigippassuk namminneq angerlarsimaffimmiissinnaanermut tapersersorneqarsinnaatitaavoq. Inuup inigisassamik nammineerluni toqqaaneratigut namminerluunniit angerlarsimaffimmiiginnarneratigut inissamik toqqaaneratigut inuup nammineq allalluunniit atugarissaarnerisa navianartorsiortinneqannginnissaa piunasaqaataavoq.

Imm. 2. Inuk innarluutilik inuk tamassuminnga pisariaqartitsippat ineqarfissatut neqeroorummiinnissamut tapersersorneqarsinnaatitaavoq.

Ikorfartortimit tapersersorneqarnissamut aaqqissuussineq

§ 10. Kommunalbestyrelsip innarluutillit ikorfartortimit tapersersorneqarnissaat neqeroorfigineqartarnissaallu siunertaralugu, ikorfartorteqartarneq aaqqissuussaq pilersissavaa:

- 1) Kommunalbestyrelsip Inatsisartut inatsisaat manna naapertorlugu tapersersuisarneq pillugu suliamik suliarinninnerani,
- 2) Inatsisartut inatsisaat manna naapertorlugu tapersersuinissaq pillugu Kommunalbestyrelsip aalajangigaanik naammagittaalliummik suliaqarnermi tunniussinermilu, aamma
- 3) Isumaginninnermi Naammagittaalliuuteqartarfiup Inatsisartut inatsisaat manna naapertorlugu tapersersuinissamik aalajangiineq pillugu naammagittaalliummik suliarinninnerani.

Imm. 2. Inuit innarluutillit inunnik allanik tassa kommunimeersuunngitsunik ikorfartortigerusutaminnik nammineq toqqaanissaminnut pisinnaatitaaffeqarput.

Imm. 3. Naalakkersuisut toqqaasarneq, aningaasarsiaqartitsineq, pinerluuteqarsimannginnermik allagartamik aamma meeqqanik innarliisimannginnermik uppersaammik piniartarneq, kiisalu ikorfartuisup piukkunnassusianut pisinnaasaanullu piumasaqaatit, piumasaqaataasussallu pillugit maleruagassanik sukumiinerusunik aalajangersaasinnaapput.

Pitsaassutsimut malitassiat

§ 11. Kommunalbestyrelsip Inatsisartut inatsisaanni matumani kapitali 4-6 naapertorlugit inunntut innarluutilinnut tapersersuinissamut pitsaassutsimut malitassiat aalajangersassavai. Pitsaassutsimut malitassiat tapersersuinerit ataasiakkaat suunerinik, imarisaanik, annertussusianik kiisalu qanoq ingerlanneqarnissaannik paasissutissanik imaqaasapput. Kommunalbestyrelsip aalajangersassavaa pitsaassutsimut malitassiat aalajangersarneqartut qanoq iliorluni malitseqartinneqassanersut.

Imm. 2. Kommunalbestyrelsi aalajangiisinnavaq Inatsisartut inatsisaat manna naapertorlugu tapersersuinerit tamarmik imaluunniit tapersersuinerit aalajangersimasut pillugit pitsaassutsimut malitassianik aalajangersaasoqassasoq.

Imm. 3. Imm. 1 malillugu pitsaassutsimut piumasaqaatit ilusaat imarisaallu pillugit maleruagassanik erseqqinnerusunik Naalakkersuisut aalajangersaasinnaapput.

Oqartussat ataatsimoorlutik akisussaaffiat

§ 12. Kommunit Naalakkersuisullu Inatsisartut inatsisaata matuma atornissanut pisortani IT-qarnermut atortumik ataatsimoorussamik atuissapput.

Pissassarfik

§ 13. Naalakkersuisut nuna tamakkerlugu innarluutilinnut sullissivik, Pissassarfik, makkuninnga suliaqartoq ingerlatissavaat:

- 1) inunnut innarluutilinnut qanigisaannullu Inatsisartut inatsisaat manna pillugu siunnersuisarneq ilitersuisarnerlu, matumani aamma tapersersorneqarnissaq pillugu aalajangiinernut naammagittaalliuteqarnissamut periarfissaq ilanngullugu,
- 2) kommunalbestyrelsenut Inatsisartut inatsisaat manna pillugu siunnersuisarneq ilitersuisarnerlu, tapersersorneqarnissanut periarfissat suliaassanillu suliarinnittarneq ilanngullugit,
- 3) § 39 naapertorlugu inuup innarluutillip ulluinnarni sapinngisamik pitsaanerpaamik piginnaaneqalernissaa siunertaralugu, inunnut innarluutilinnut pisinnaanngorsarneqarnissamik piginnaanngorsaqqinneqarnissamillu neqerooruteqarneq,
- 4) inunnut innarluutilinnut tapersersuinerlut kiisalu inunnut innarluutilinnut tunngasunut pissutsinut tunngatillugu ilisimasaqarnernik katersineq siammarterinerlu,
- 5) kommuninut, inunnut innarluutilinnut taakkulu qanigisaannut innarluuteqarneq aammalu tapersersorneqarnissamut periarfissat pillugit pikkorissaanernik neqerooruteqarneq,
- 6) suliani immikkorluinnaq ittuni kommunalbestyrelsemit peqquneqarnikkut qulaajaaneq, tak. § 20, imm. 2, aamma
- 7) kommunalbestyrelsemit qinnuivigineqarnikkut qaammatisiutit malillugit ullunik 14-inik piffissaqarluni najugaqarfissatut neqeroorummiikkunnaarnissaq pillugu suliani § 60, imm. 3 naapertorlugu oqaaseqaateqartarneq.

Imm. 2. Naalakkersuisut kommunalbestyrelsip Pissassarfimmik atuineranut akigititat pillugit malittarisassanik sukumiinerusunik aalajangersaasinnaapput.

Kapitali 3

Suliaassanik suliarinninneq aamma iliuusissatut pilersaarutit

Suliaassanik suliarinninnermi tunngaviit

§ 14. Inatsisartut inatsisaat manna naapertorlugu tapersersuinissaat pillugit aalajangiinerit inummut pineqartumut suut pitsaanerpaajussanersut tamakkiisumik nalilersuiffiginerat tunngavigalugu aalajangiiffigineqassapput.

Imm. 2. Pissutsit inummut innarluutilimmut tunngassuteqartut pillugit sapinngisamik inuup innarluutillip nammineq isumai innimigineqassapput nammineerlunilu piginnaasatigut ineriartorneranilu killiffia pissusissamisoortumik qajassuunneqassallutik.

§ 15. Inuk innarluutilik, Inatsisartut inatsisaat manna malillugu tapersersorneqarnissamik qinnuteqartoq, kommunalbestyrelsip piumaffigisinnaavaa:

- 1) paasissutissanik inuup qanoq tapersersorneqarnissamut pisinnaatitaaneramik kommunalbestyrelsip aalajangiisinnaanissanut pisariaqartunik pissarsiniarnermi peqataassasoq, aamma
- 2) nakorsamit misissorneqarnissaq imaluunniit malinnaavigineqarnissaq siunertaralugu unitsinneqarnissaq, kiisalu pisariaqartillugu qulaajaanermut atatillugu katsorsarneqarnissaq.

Imm. 2. Inuup innarluutillip, angajoqqaatut oqartussaassusillip imaluunniit akisussaatitaasup akuersineratigut kommunalbestyrelsip oqartussanit allanit inuup pissusaanik imaluunniit inuup innarluuteqarneranik ilisimasaqartunit paasissutissanik piniarsinnaavoq, paasissutissat Inatsisartut inatsisaat manna naapertorlugu tapersersorneqarnissaq pillugu qinnuteqaatip suliarineqarnissaanut pisariaqartutut isigineqarsinnaappata, taamaattorli tak. imm. 3.

Imm. 3. Inuk innarluutilik paasititsilluni akuersissummik tunniussisinnaanngippat, aammalu taassumunnga angajoqqaatut oqartussaassusilinnit imaluunniit akisussaatitaasumit akuersissut pissarsiarineqarsinnaanngippat, inuup soqutigisaasa illersorneqarnissaat eqqarsaatigalugu tamanna pingaaruteqartuusoq isumaqarfigineqarpat kommunalbestyrelsip paasissutissanik piniarsinnaavoq.

Aalajangiinerit aamma qulaajaaneq

§ 16. Kommunalborgstyrelsip inunnut innarluutilinnut tapersersuinissaq pillugu kapitali 4-mi aalajangersakkat naapertorlugit imaluunniit ineqarnissamut neqeroorut pillugu kapitalit 6 aamma 7-mi aalajangersakkat naapertorlugit aalajangiissaaq.

Imm. 2. Imm. 1 naapertorlugu aalajangiineq pisinnaavoq:

- 1) inuup innarluutillip qinnutigisimappagu,
- 2) inuup pineqartup akisussaatitaasuanit qinnutigisimappagu,
- 3) inummut pineqartumut angajoqqaatut oqartussaassusillip qinnutigisimappagu, imaluunniit
- 4) kommunalborgstyrelsip nammineq piumasarisimappagu.

Imm. 3. Imm. 1 malillugu aalajangiineq inuit innarluutilit ataasiakkaat pisariaqartitaannik pisinnaasaannillu immikkut nalilersuineq tunngavigalugu pissaaq. Inuk ataavartumik pisinnaanik innerulersimanersoq kommunalborgstyrelsip nalilersuinermini qulaajaaffigissavaa.

Imm. 4. Kommunalborgstyrelsip imm. 1 naapertorlugu aalajangiisoqannginnerani, inuk innarluutilik aamma angajoqqaatut oqartussaassusillit imaluunniit akisussaatitaasoq oqaloqatigereersimassavai, tak. § 23.

Imm. 5. Pinartumik tapersersorneqarnissamik pisariaqartitsisoqartillugu Kommunalborgstyrelsi tapersersorneqarnissaq pillugu aalajangiissaaq aammalu aalajangiineq nalunaaquttap akunnerisa 48-it iluanni atuutsinneqalersissallugu, § 23 naapertorlugu oqaloqatiginnittoqarsimanngikkaluarpalluunniit, § 18 naapertorlugu qulaajaaneq suliarineqarsimanngikkaluarpalluunniit, §§ 24-25 naapertorlugit iliuusissatut pilersaarut suliarineqarsimanngikkaluarpalluunniit imaluunniit naammassineqarsimanngikkaluarpalluunniit.

Imm. 6. Kommunalborgstyrelsip pisariaqanngitsumik kinguarsaanertaqanngitsumik imm. 5 malillugu iliuusissat aallartissavai:

- 1) oqaloqatiginnissaaq, tak. § 23,
- 2) qulaajaassaaq, tak. § 18, iliuusissatut pilersaarusiussaaq, tak. §§ 24-25, pisariaqarpallu taakku tunngavigalugit nutaamik aalajangiissaaq..

§ 17. Kommunalbestyrelse inunnut innarluutilinnut immikkut ikiortarialittut nalilikkanut immikkorluinnaq ittumik iliuuseqassaaq.

Imm. 2. Nalilersuineq aamma imm. 1 naapertorlugu suliniutit allartinneqartut suliamik ingerlatsineq tamanillu isiginnilluni nalilersuineq aallaavigalugit pissapput.

§ 18. Kommunalbestyrelsip inuup innarluutillip atugai pillugit qulaajaaneq ingerlatissavaa, inuk kapitali 4-mi aalajangersakkat naapertorlugit tapersersorneqarnissamik pisariaqartitsisutut imaluunniit kapitalit 6 imaluunniit 7-mi aalajangersakkat naapertorlugit ineqarnissamut neqeroorummi najugaqarnissamik pisariaqartitsisutut ilimagineqarpat. Qulaajaaneq ingerlanneqassanngilaq, tamanna pisariaqanngitsoq ersarippat.

Imm. 2. Qulaajaaneq sapinngisamik ukuninnga akimut suleqateqarluni ingerlanneqassaaq:

- 1) inuk innarluutilik,
- 2) inummut akisussaatitsisoqarpat tassunga akisussaatitaasoq,
- 3) meeraappat tassunga angajoqqaatut oqartussaassusilik, aamma
- 4) isumassuisut allat,
- 5) peqqinnissaqarfik,
- 6) pisortani oqartussat suliamut attuumassuteqartut, kiisalu
- 7) paaqqinnittarfiit inunnik innarluutilinnik ilisimasaqartut.

Imm. 3. Qulaajaaneq, ajornanngippat qajassuartumik ingerlanneqassaaq siunertamilu anguniarneqartunit annertunerussanani.

Imm. 4. Kommunalbestyrelsi qulaajaanermut atatillugu ukuninnga nalilersuissaaq:

- 1) Timikkut, tarnikkut, silassorissutsikkut imaluunniit malugisaqarsinnaassutsikkut ataavartumik pisinnaanikinnerulersimanerup annertussusianik.
- 2) Imminut isumassorsinnaaneq.
- 3) Pissusilersortarneq, atugarissaarneq ineriartornerlu.
- 4) Attaveqatigiinneq.
- 5) Ilaqutariinni pissutsit.
- 6) Inuttut atukkani pissutsit inunnillu attaveqartarneq.
- 7) Peqqissutsikkut pissutsit.
- 8) Ilinniagaqarneq, suliffeqarneq suliffissaqarnermullu periarfissat.
- 9) Inuiaqatigiinni peqataaneq tamassumanilu pisinnaasat.
- 10) Inatsisartut inatsisaat una malillugu imaluunniit inatsisit allat malillugit inummut tapersersuineq.

Imm. 5. Naalakkersuisut killilimmik nassuiaateqarnissaq kiisalu nassuiaateqarnissaq pisariaqanngitsoq ersarikkaangat nassuiaateqartariaqannginneq pillugit aalajangersakkanik sukumiinerusunik atulersitsisinnaapput.

§ 19. Kommunalbestyrelse qulaajaaneq tunngavigalugu tapersersuinissap aallartinneqarnissaanut tunngavissaqarnersoq aalajangiissaaq.

Imm. 2. Qulaajaaneq inuup innarluutillip tapersersorneqarnissamik pisariaqartitsisinnaaneranik kommunalbestyrelsip paasisaqarnerata kingorna kingusinnerpaamik qaammatit marluk qaangiunneranni naammassineqassaaq. Qulaajaanerp naammassineranut atatillugu, inuk innarluutilik. Tapersersorneqassappat atortunilluunniit ikiuutinik tunineqassappat aalajangiisoqassaaq aammalu allaganngorlugu iliuusissatut pilersaarut suliarineqassalluni.

Imm. 3. Kommunalbestyrelsemit qulaajaaneq naammassineqarsinnaasimanngippat imaluunniit imm. 2-mi piffissaliussap aalajangerneqartup iluani iliuusissatut pilersaarusiortoqanngippat utaqqiisaasumik nalilersuissaaq, inuk innarluutilik, inummut innarluutilimmut angajoqqaatut oqartussaassusillit imaluunniit akisussaatitaasoq tamanna pillugu ulloq qulaajaanerp iliuusissatulluunniit pilersaarutip naammassineqarfissaatut ilimagineqartoq allaganngorlugu ilisimatinneqassalluni.

§ 20. Tapersersuineq pillugu kommunalbestyrelse utaqqiisaasumik aalajangiisimappat kommunalbestyrelse qulaajaanerp naammassineqarneranut atatillugu tapersersuineq utaqqiisaasumik aalajangiineq tunngavigalugu aallartinneqartoq ingerlateqqinneqassanersoq atorunnaarsinneqassanersorluunniit isummissaaq. Tassunga atatillugu inuk angajoqqaatullu oqartussaassuseqartup imaluunniit akisussaatitaasup tapersersuineq qanoq isummerfigineraat eqqarsaatigineqassaaq.

Imm. 2. Kommunalbestyrelsip suliani immikkut pisariusuni § 18, imm. 1 naapertorlugu qulaajaanissap ingerlannissaa pillugu Pissassarfimmuk qinnuiginnissinnaavoq.

Suliassanik suliarinninnermi piffissaq aamma malitseqartitsineq

§ 21. Kommunalbestyrelsip aalajangiinissaq siunertaralugu Inatsisartut inatsisaat una malillugu tapersersorneqarnissaq pillugu, taamaattoqarpallu suut tapersiissutaassanersut pillugit apeqqutit pillugit pisariaqanngitsumik kinguarsaanertaqanngitsumik suliarissavai.

Imm. 2. Tapersersorneqarnissaq pillugu qinnuteqaatip tiguneqarneranit, aalajangiinerup pereersimanissanut piffissaq qanoq sivisutigissanersoq, piffissamut killiliussanik kommunalbestyrelsi aalajangersaassaaq. Inatsisartut inatsisaanni matumani piffissaliussamut aalajangersaasoqarsimappat tamanna atuutissanngilaq. Piffissamut killissaliussat annerpaamik ukiut sisamakkuutaarlugit nalilersorneqartassapput kommunillu nittartagaatigut tamanut saqqummiunneqassallutik.

Imm. 3. Imm. 2 naapertorlugu piffissaliussaq suliame aalajangersimasumi malinneqarsinnaanngippat, inuk innarluutilik, angajoqqaatut oqartussaassusillit, imaluunniit akisussaatitaasoq, piffissaliussap naannginnerani allaganngorlugu nalunaarfigineqassapput aalajangiineq qaqugu pisinnaanersoq, kiisalu sooq piffissaliussaq eqqortinneqarsinnaannginnerersoq.

§ 22. Kommunalbestyrelsemit tapersuinissaq imaluunniit najugaqarfissatut neqeroorummi najugaqarnissaq pillugu aalajangiisoqareerpat, tapersersuineri siunertaasoq naammassineqarnersoq ingerlaavartumik malinnaaffigissavaa. Inuk innarluutilik sapinngisamik suleqatigalugu malitseqartitsisoqassaaq.

Imm. 2. Ingerlaavartumik malitseqartitsineq pillugu maleruagassanik erseqqinnerusunik Naalakkersuisut aalajangersaasinnaapput.

Oqaloqatigiinneq

§ 23. Kommunalbestyrelsip §§ 16, 19, 60, 63 imaluunniit 73 naapertorlugit aalajangiisoqannginnerani inuk innarluutilik minnerpaamik ataasiarluni oqaloqatigissavaa.

Imm. 2. Imm. 1 malillugu kommunalbestyrelsip oqaloqatiginninnermini inuup pineqartup innarluutaa eqqarsaatigissavaa aammalu oqaloqatigiinneq inuup innarluutillip piumasai tunngavigalugit ingerlatissallugu.

Imm. 3. Innarluutilik 18-it inorlugit ukioqarpat imaluunniit nammineersinnaanngitsut nakkutigineqarpat imm. 1 malillugu oqaloqatigineqarnera, inuk innarluutilik, taassumunnga angajoqqaatut oqartussaassusillit imaluunniit akisussaatitaasoq peqataatillugit ingerlanneqassaaq.

Imm. 4. Taamaattoq inummut innarluutilimmut pitsaanerpaasorineqarpat, angajoqqaatut oqartussaassusillit imaluunniit akisussaatitaasoq akuersiteqqaarnagit imaluunniit najuutsinnagit oqaloqateqarneq ingerlanneqarsinnaavoq.

Imm. 5. Angajoqqaatut oqartussaassusillit imaluunniit akisussaatitaasoq akuersiteqqaarnagit imaluunniit peqataatinnagit oqaloqatigiinneq ingerlanneqassappat, illersuisutut ataatsimiinnermi peqataasussamik toqqaasoqassaaq, tak. § 10.

Imm. 6. Inuup inerisimanera pisinnaassusialu imaluunniit suliap suussusia eqqarsaatigalugit oqaloqatigiinnerup ingerlanneqarnissaa aalajangiisuusumik naleqqutinngippat, imm. 1 naapertorlugu oqaloqatigiinnissaraluaq kommunalbestyrelsimit taamaatiinnarneqarsinnaavoq. Oqaloqatigiinneq ingerlanneqarsinnaanngippat, inuup innarluutillip aalajangiinissatut eqqarsaatigineqartumut isumaa allatut pissarsiariniarneqassaaq. Oqaloqatigiinneq ingerlanneqarsimanngippat, tamanna inuup iliuusissatut pilersaarutaani tunngavilersuineq ilanngullugu allanneqassaaq.

Iliuusissatut pilersaarut

§ 24. Kommunalbestyrelsip inunnut innarluutilinnut allaganngorlugu iliuusissatut pilersaarut suliarissavaa ima pisoqartillugu:

- 1) Qulaajaanermut atatillugu, tak. §§ 18, 19 imaluunniit 20.
- 2) Kapitalit 4-5 naapertorlugu tapersersorneqarnissap imaluunniit kapitalit 6 imaluunniit 7 naapertorlugit najugaqarfissatut neqeroorummi najugaqarnissap aallartinnissaa pillugu aalajangiisoqannginnerani.

- 3) Kapitali 8 naapertorlugu tapersersuinerup allanngortinneqarnissaa imaluunniit unitsinneqarnissaa pillugit aalajangiisoqannginnerani.
- 4) Meeqqap innarluutillip, Inatsisartut inatsisaat manna naapertorlugu tapersersorneqartup, meeqqat atuarfianni atualernissaa kingusinnerpaamik qaammatinik 6-inik sioqqullugu.
- 5) Meeqqap innarluutillip, Inatsisartut inatsisaat manna malillugu tapersersorneqartup, meeqqat atuarfianni atuarnata naammassinissaa kingusinnerpaamik qaammatinik 12-inik sioqqullugu.
- 6) Meeqqap innarluutillip, Inatsisartut inatsisaat manna malillugu tapersersorneqartup, 18-inik ukioqalernissanut kingusinnerpaamik qaammatinik 12-inik sioqqullugu.

§ 25. Iliuusissatut pilersaarut, § 24 malillugu, inummut innarluutilimmut tunngasuussaaq aammalu siunertami anguniarneqartunit annertunerusinnaanani.

Imm. 2. Iliuusissatut pilersaarummi tulliini taaneqartut allassimassapput:

- 1) Siunertaq aamma tapersersuinermi anguniagaq.
- 2) Anguniagaq imaluunniit anguniakkat anguneqarnissaannut tapersersuineq suna pisariaqarnerseq.
- 3) Tapersersuinerup sivilusissusaatut naatsorsuutigineqartoq.
- 4) Tapersersuinerup malitseqartitsinissaq, matumani malitseqartitsineq qaqugukkut pisassanersaq ilanngullugu.
- 5) Inatsisartut inatsisaat manna malillugu aamma inatsisit allat malillugit tapersersuinerit allat ataqatigiinnerat.
- 6) Ilaquttat attaveqarfiillu, najugaqariaaseq, ilinniartitaaneq, suliffeqarneq, inuttut ikiorteqarneq, katsorsartinneq aamma atortorissaarutit ikiuutaasut il.il. pillugit pissutsit immikkut ittut allat.
- 7) Iliuusissamut pilersaarummut inuup innarluutillip nammineq oqaaseqaatai.

Imm. 3. Iliuusissatut pilersaarut sapinngisamik inuk innarluutilik tassungalu akisussaataasoo angajoqqaatullu oqartussaassusillit aamma allat isumassuisui oqaloqatigalugit suleqatigalugillu suliarineqassaaq.

Imm. 4. Qulaajaanerp naammassineqarneranit qaammatip ataatsip ingerlanerani iliuusissatut pilersaarut saqqummiunneqarsimassaaq.

Imm. 5. Kapitali 6-7 malillugit najugaqarfissatut neqeroorummiinnermi iliuusissatut pilersaarut ilai attuumassuteqartut najugaqarfissatut neqeroorummut tunniunneqarnissat kommunalbestyrelsip isumagissavaa.

Imm. 6. Iliuusissatut pilersaarut inummut innarluutilimmut tassungalu akisussaataasumut imaluunniit angajoqqaatut oqartussaassusilimmut tunniunneqassaaq, aammalu kommunalbestyrelse tunniussinermut atatillugu taassuma imarisai pillugit ilisimatitsissaaq.

Paasissutissanik avitseqatigiittarneq

§ 26. Najugaqarfissatut neqeroorutip, kommunalbestyrelsip, Naalakkersuisut, ilinniarfeqarfiit peqqinnissaqarfiullu suliani ataasiakkaani suleqatigiinnermut ilaatillugu, paasissutissat suliap suliarineqarneranut pingaaruteqarpata, inummut paasissutissat politiinut ingerlateqqissinnaavai, matumani aamma paasissutissat inummut tunngasut mianernartut ilanngullugit, matumanilu paasissutissat suliap suliarinissaanut pingaaruteqarsimappata.

Imm. 2. Inuk suliami pineqartoq, taassumunngaluunniit angajoqqaatut oqartussaassuseqartut imaluunniit akisussaataasua akuersiteqqaarlugu paasissutissanik ingerlatitseqqittoqarsinnaavoq, taamaattoq takuuk imm. 3.

Imm. 3. Imm. 2 malillugu akuersissut tunniunneqarumanngippat, imaluunniit allanik pissuteqartumik akuersisummik piniartoqarsinnaanngippat, kommunalbestyrelsip paasissutissat inummut tunngasut ingerlateqqissinnaavai, matumani aamma paasissutissat inummut tunngasut mianerilluinnartariaqartut ilanngullugit, suliami pissutsit, matumani inuup inatsisitigut isumannaatsuunissaata eqqarsaatigineqarnera ilanngullugu, erseqqissumik pisariaqartippassuk. Ingerlatitseqqinnermut piumasaqaataavoq inuup soqutigisaanik nakkutigininnissaq, taamaaliornerullu isertuussiinnarnissamik peqquteqarnissamut soqutigisat ersarissumik qaangersimassagai, matumani inuup pineqartup, paasissutissat tunngaviata, mianerineqarnissaata eqqarsaatigineqarnissaa ilanngullugu.

§ 27. Kommunalborgstyrelsip inuit pillugit paasissutissat Pissassarfimmud ingerlateqqissinnaavai, inummut tunngasut paasissutissat mianerisassat ilanngullugit, Pissassarfik § 13, imm. 1, naapertorlugu suliaqarpata, paasissutissat suliap suliarineqarneranut pingaaruteqarpata.

Imm. 2. Kommunalborgstyrelsip imm. 1 malillugu inuk pillugu paasissutissat suliami pineqartoq imaluunniit angajoqqaatut oqartussaassuseqartoq inummulluunniit akisussaataasoo akuersiteqqaarlugit ingerlateqqissinnaavai, takujulli imm. 3.

Imm. 3. Kommunalborgstyrelsip imm. 2 naapertorlugu akuersissut tunniunneqarumanngippat, imaluunniit allanik pissuteqartumik akuersisummik pissarsinissaq periarfissaasimanngippat, pineqartoq pillugu paasissutissat ingerlateqqissinnaavai, tassunga aamma ilanngullugit suliami pissutsit inuup inatsisitigut illersorneqarnissaata mianerineqarnissaa pillugu paasissutissat mianernartut, suliami pissutsit tunngavissaqartippatigit. Piumasaqaataavoq ingerlatitseqqiinnermi inuup soqutigisaanut tunngavigineqarnissaat, soqutigisallu isertuussinissamut tunngaviusut mianerineqarnissaat salliutinneqarluni tassa isertuunneqarnerinut tunuliaqutaasut, inummut tunngasut paasissutissat mianerineqartussat.

§ 28. Innarluutilimmut qitiusumik innersuussisarfik aqutigalugu ulloq unnuarlut neqeroorummi inissamik utaqqisumut inissiiviugallartussamik pissarsinissamik kommunalborgstyrele pisussaaffeqarpoq.

Imm. 2. Utaqqiisaasumik inissiivik nammineq angerlarsimaffimmi imaluunniit kommunip najugaqarfissatut neqeroorutaani inissisimasinnaavoq, tassanilu utaqqiisaasumik

tapersersuinerit inuup innarluutillip pisariaqartitaanik naammassinnissinnaasut atorpeqassapput.

Kapitali 4

Tapersersuinermi periutsit

Qanigisat inummut innarluutilimmut paarsinerat

§ 29. Kommunalbestyrelsi inummut innarluutilimmut ataatsimut qanigisaasumik, suliffeqarnermut attuumassuteqartumik, atorfinitsitsinnaavoq kommunalbestyrelsi ulloq unnuarlu neqeroorummi inissamik utaqqippat imaluunniit qulaajaaneq imaluunniit iliuusissatut pilersaarut amigarpata.

Imm. 2. Imm. 1 malillugu tapersersuineq, kommunalbestyrelsip inummik isumassuisumik atorfinitsitsineratigut pissaaq. Inuup innarluutillip pisariaqartitsinera tunngavigineqarluni sapaatip akunneranut nalunaaquttap akunnerisa 40 tikillugu atorfeqartitsiviusussat amerlassusissai, kommunalbestyrelsip aalajangersaaffigissavai.

Imm. 3. Naalakkersuisut qanigisamik atorfinitsitsineq aamma akissarsiaqartitsineq pillugit malittarisassanik sukumiinerusunik aalajangersaassapput, takuuk imm. 1-2.

§ 30. Kommunalbestyrelsip inuk suliffeqarnermut attuumassuteqartoq inummut innarluutilimmut ataatsimut qanigisaasoq atorfinitsissinnaavaa kommunalbestyrelse ulloq unnuarlu neqeroorummi inissamik utaqqippat imaluunniit qulaajaaneq iliuusissatulluunniit pilersaarut amigarpata, aammalu:

- 1) kommunalbestyrelsi ulloq unnuarlu neqeroorummi tulluurtumik inissamik utaqqippat imaluunniit qulaajaanermi imaluunniit iliuusissatut pilersaarummi ilaasa amigarpata, aammalu,
- 2) paarisqaarnissamut atugassarititaasut pilersinnissat pillugit illuatungeriit isumaqatigiissimappata, aamma
- 3) kommunalbestyrelsip inuup pineqartup qanigisamik paarsaqartup eqqarsaatigisassanut pingaarutilinnut akerliunnginnissaa nalilerpagu.
- 4) qanigisap inuup innarluutillip paarinissaa akerlilissallugu annerusumik pissutissaqanngitsoq kommunalbestyrelsi naliliippat,

Imm. 2. Inuup innarluutillip najukkatut kommunigisaani qanigisaasoq kommunalbestyrelsimut atorfinitsinneqassaaq.

Imm. 3. Qanigisaq inuup innarluutillip paarinissaa siunertarlugu qaammatit arfinillit tikillugit atorfinitsinneqarsinnaavoq. Paarsinermut piffissaq qaammatit pingasut angullugit sivitsorneqarsinnaavoq, tamatumunnga pissutsit immikkut ittut tunngavissaqartitsippata, taamaattoq § 31 takuuk.

Imm. 4. Naalakkersuisut qanigisamik atorfinitsitsineq aamma akissarsiaqartitsineq pillugit malittarisassanik sukumiinerusumik aalajangersaassapput, takuuk imm. 1.

§ 31. Kommunalbestyrelsi immikkut pisoqartillugu, suliap pineqartup tigussaasumik aammalu suliatigut nalilersuiffigereerneratigut, § 30 naapertorlugu angerlarsimaffimmi inuup innarluutillip paarineqarnissaanut tapiissutinik tunniussaqaarsinnaavoq piffissami § 30, imm. 3 naapertorlugu aalajangersarneqartumit sivisunerusumi.

Imm. 2. Imm. 1 malillugu tapiissutit aatsaat tunniunneqaarsinnaassapput:

- 1) inuup innarluutillip angerlarsimaffimmi paarineqarnissaa tulluarnarpaatut isigineqarpat, aamma
- 2) angerlarsimaffiup avataani paarsinissamut periarfissat tulluurtut allat nassaassaqaannginnerannik inerniliiffiusumik tunngavilersukkamik suliatigut naliliineq peqarpat.

Imm. 3. Imm. 1-mi naapertorlugu tapiissutit sivitsorneqarnissaat piffissamut qaammatit 12-it angullugit tunniunneqaarsinnaavoq. Sivitsuinnissat imm. 2-mi piumasaqaatit sulii naammassineqaarsimappata taamaallaat tunniunneqaarsinnaapput.

Tapersersorti

§ 32. Inummut innarluutilimmut, pingaarutilimmik timikkut, tarnikkut, silassorissutsikkut imaluunniit malugisaqaarsinnaanikkut piginnaanikinnerulersimasumut, nammineq angerlarsimaffimmini nammineersinnaanissamut, najugaqaqatigiiffimmi imaluunniit najugaqarfimmi illersugaasumi imaluunniit utoqqarnut angerlarsimaffimmi isumaginninnikkut perorsaasumit tapersersorneqarnissamik pisariaqartitsisumut, tapersersortitut ikiortimik kommunalbestyrelse neqerooruteqassaaq.

Imm. 2. Naalakkersuisut tapersersortinut tunngasunik erseqqinnerusunik maleruagassanik aalajangersaassapput, tak. imm. 1.

Ingiallorteqarneq

§ 33. Inummut innarluutilimmut innarluuteqarnini pissutigalugu kisimiilluni angalaarsinnaanngitsumut kommunalbestyrelsip qaammammut nalunaaquttap akunneri 15-it tikillugit ingiallorteqarnissaaq neqeroorutigissavaa. Kommunalbestyrelsip qaammammut nalunaaquttap akunneri 15-it tikillugit ingiallorteqarnissaaq neqeroorutigissavaa tamanna pisariaqartinneqartoq nalilerneqarpat.

Imm. 2. Kommunalbestyrelsi Kalaallit Nunaanni angerlarsimaffiup avataani ingerlanneqartuni sammisassanut aaqqissuussanullu ingiallorteqarnermik neqerooruteqaarsinnaavoq.

Imm. 3. Naalakkersuisut ingiallorteqarneq pillugu erseqqinnerusunik maleruagassanik aalajangersaassapput, tak. imm. 1 aamma 2.

Nuunnermut ikiorsiineq

§ 34. Kommunalbestyrelsi najugaqarfimmiit nuunnermut atatillugu aningaasartuutit matussusernissaannut meeqqap innarluutillip angajoqqaatut oqartussaassusilimmut imaluunniit pisariaqarpat akisussaatitaasumut aningaasaqarnikkut tapiissuteqarnissamik neqerooruteqarsinnaavoq ima pisoqartillugu:

- 1) angajoqqaatut oqartussaassusillit imaluunniit akisussaatitaasup maannakkut najugaanni meeqqap tapersersorneqarnissamik aammalu isumassorneqarnissamik pisariaqartitai naammassineqarsinnaanngippata imaluunniit ajornakusoorluni naammassineqarsinnaappata,
- 2) Inatsisartut inatsisaat manna malillugu tapersersorneqarnissamut meeqqap pisariaqartitai, siunissami najugariligassatut kissaatigineqartumi pitsaannerusumik naammassineqarsinnaappata, aamma
- 3) angajoqqaatut oqartussaassusillit imaluunniit akisussaatitaasoq nuunnissaq kissaatigalugu erseqqissumik oqaatigisimappassuk.

Imm. 2. Meeqqamut innarluutilimmut angajoqqaatut oqartussaassusilimmut imaluunniit akisussaatitaasumut najugaqarfimmiit nuunnermut atatillugu aningaasartuutit matussusernissaannut Kommunalbestyrelsi aammattaaq aningaasaqarnikkut tapiissuteqarsinnaavoq, ulloq unnuarluni neqeroorummik innersuussineq pillugu aalajangiisoqarpat, aammalu meeqqamut pitsaannerpaatut nalilerneqarpat angajoqqaatut oqartussaassusillit imaluunniit akisussaatitaasoq ulloq unnuarluni neqeroorutip inissisimaffigisaani illoqarfimmut nuussinnaanissaat. Imm. 1, nr. 1-3-mi piunasaqaatit naammassineqarsimassapput.

Imm. 3. Kommunalbestyrelsi inunnut innarluutilinnut 18-it sinnerlugit ukiulinnut najugaqarfimmiit nuunnermut atatillugu aningaasartuutit matussusernissaannut aningaasaqarnikkut tapiissuteqarsinnaavoq ima pisoqartillugu:

- 1) inuup innarluutillip tapersersorneqarnissamik pisariaqartitai maannakkut najugaqarfimmi naammassineqarsinnaanngippata imaluunniit ajornakusoorluni naammassineqarsinnaappata,
- 2) inuup innarluutillip Inatsisartut inatsisaat manna naapertorlugu tapersersorneqarnissamik pisariaqartitai najugaqarfimmi nutaami kissaatigineqartumi pitsaannerusumik naammassineqarsinnaappata, aammalu
- 3) inuk innarluutilik imaluunniit akisussaatitaasoq nuunnissaq kissaatigalugu erseqqissumik oqaatigisimappata.

Imm. 4. Kommunalbestyrelsi inummik innarluutilimmut najugaqarfimmiit nuunnermut atatillugu aningaasartuutit matussusernissaannut aningaasaqarnikkut tapiissuteqassaaq, inunnut innarluutilinnut kommunip avataani najugaqatigiiffimmut imaluunniit illersugaasumik najugaqarfissamut neqerooruteqartoqartillugu, tak. § 34.

Imm. 5. § 34, imm. 3 naapertorlugu tapersersuineq nuunnermut ikiorsiineq pillugu inatsisini allani aalajangersakkanut salliunneqassaaq.

Eqimattakkaanut tapersersuineq

§ 35. Inunnut timikkut imaluunniit tarnikkut piginnaasakinnerulersimasunut tunngatillugu Kommunalbestyrelsi eqimattakkaarluni tapersersorneqarnissamik kiisalu eqimattakkaarluni sungiusarneqarnissamik aammalu pisinnaasanik ineriartortitsinissamut ikiorsiissutinik aallartitsisinnaavoq imaluunniit neqerooruteqarsinnaavoq.

Imm. 2. Imm. 1 naapertorlugu neqeroorutini tunniussinissamut piumasaqaataavoq kommunalbestyrelsip nalilersussagaa taamatut neqeroorutini peqataaneq ikiorneqartup maannakkut pisinnaasaanik pitsanngorsaasinnaasoq imaluunniit piginnaasakinnerulernerup ajornerulersinnaanerani pinaveersaartitsisinnaasoq.

Imm. 3. Eqimattakkaarluni tapersersuinnermut tapiissutit neqeroorutitut tunniunneqarsinnaapput, tassani eqimattaq inuup ilaqutaanik aamma imaqarsinnaalluni.

Imm. 4. Naalakkersuisut eqimattakkaarluni tapersersuinnermut neqeroorutit pillugit erseqqinnerusunik maleruagassanik aalajangersaasinnaapput.

Inunnut ataasiakkaanut piffissami killilikkami tapersersuineq

§ 36. Inunnut timikkut imaluunniit tarnikkut pisinnaasakinnerulersimasunut tunngatillugu Kommunalbestyrelsi piffissami killilikkami inunnut ataasiakkaanut tapersersorneqarnissamik kiisalu piffissami killilikkami inunnut ataasiakkaanut sungiusarneqarnissamik aammalu piginnaasanik ineriartortitsinissamut tapersersorneqarnissamik aallartitsisinnaavoq imaluunniit neqeroorutitut tapiissuteqarsinnaavoq. Neqeroorneq ataasiarluni qaammatit 6-it tikillugit tunniunneqarsinnaavoq.

Imm. 2. Imm. 1 naapertorlugu neqeroorutini tunniussinissamut piumasaqaataavoq kommunalbestyrelsip nalilersussagaa neqeroorneq tigusissusap maannakkut piginnaasaanik pitsanngorsaasinnaasoq imaluunniit piginnaasakinnerulernerup imaluunniit inuuniarnikkut ajornartorsiutit ajornerulernissaannik pinaveersaartitsisinnaasoq.

Imm. 3. Naalakkersuisut inunnut ataasiakkaanut piffissami killilikkami tapersersuinnermut neqeroorutit pillugit erseqqinnerusunik maleruagassanik aalajangersaasinnaapput.

Oqilisaassisarneq

§ 37. Kommunalbestyrelsi inummut innarluutilimmut oqilisaassisarnermut atatillugu najugaqarnissamut neqerooruteqassaaq, ima pisoqartillugu:

- 1) Inuup innarluutillip isumassorneqarnissaanut suliaasaq angajoqqaatut oqartussaassusillit, qanigisaasut allat imaluunniit ilaqutariit paarsisartut isumassuinerannik isumaginnittut annertuumik suliaqarnerulersitsippat imaluunniit annertuumik tarnikkut artukkiissutaappat, aammalu
- 2) angajoqqaatut oqartussaassusillit, qanigisaasut allat imaluunniit ilaqutariit paarsisartut isumassuinnermik sulii ingerlatsiinnarsinnaanissaannut oqilisaassineq pisariaqartinneqarpat.

Imm. 2. Inuk innarluutilik imm. 1 naapertorlugu oqilisaassisarnermut atatillugu najugaqarnissamut neqeroorfigineqartillugu, kommunalbestyrelsi najugaqarfiup atugassarititaasut pillugit oqilisaassisarfirmik allaganngorlugu isumaqatigiissuteqassaaq.

Imm. 3. Kommunalbestyrelsi oqilisaassisarnermut atatillugu najugaqarnissamut aalajangiinnermi ilaqutariinnut paarsisartunut imaluunniit ulloq unnuarlu neqeroorummot akissarsiasanik akuersissuteqassaaq. Akissarsiasat inuup oqilisaassisarnermut atatillugu najugaqarnerani pilersorneqarneranut aningaasartuutinik imaqanngillat.

Imm. 4. Oqilisaassisarnermut atatillugu pilersuinnermut akiligassat pilersuisussaataasumit akilerneqassapput.

Imm. 5. Inuk innarluutilik aammalu ilaqutariit paarsisartut imaluunniit ulloq unnuarlu neqeroorut kommunalbestyrelsi pineqartup angerlarsimaffittut kommunianiittoq suleqatigalugu pilersuinnerup qanoq akilerneqarnissaa pillugu isumaqatigiissuteqassapput. Inuk innarluutilik 18-it ataallugit ukioqarsimappat imaluunniit inatsisitigut oqartussaassuseqanngippat, angajoqqaatut oqartussaassusilik imaluunniit akisussaataasooq inuup innarluutillip sinnerlugu isumaqatigiissusiussaaq.

Imm. 6. Oqilisaassisarnermi aningaasarsiat Naalakkersuisunit aalajangerneqartut akigitat atuutilinnginnerini ukioq sioqqullugu kingusinnerpaamik 15. novemberimi nittartakkatigut nalunaarutit.gl-imi saqqummiunneqassapput.

Allatut ikiorsiissutit

§ 38. Ikiorsiissutit sorliit kommunalbestyrelsip neqeroorutigissanerai Naalakkersuisut malittarisassanik erseqqinnerusunik aalajangersaassapput, ilaatigut:

- 1) Ikiuutit,
- 2) Inigisap allanngortinneqarnera,
- 3) Qamutit motoorillit, biilit pinnagit.
- 4) Ataatsimoortunik angallassinermik aaqqissuussineq,
- 5) Uppernarsarneqarsinnaasut aningaasartuuteqarnerusut,
- 6) Suliffissaqartitsinnermut, sammisassaqartitsinnermut katerisimaaqateqarnissamullu neqeroorutit,
- 7) Pikkorissaanerit ilinniartitsinerillu, matumani qanigisaasut ilanngullugit.
- 8) Sungiusarneq.

Pissassarfimmi piginnaanngorsarneq aamma piginnaanngorsaqqinneq

§ 39. Kommunalbestyrelsi Pissassarfimmi inuup innarluutillip piginnaanngorsarneqarnissaanik aammalu piginnaanngorsaqqinneqarnissaanik neqerooruteqarnissaaq pillugu aalajangiisinaavoq, matumani piffissami killilimmi najugaqarneq ilanngullugu, tamanna inuup pisinnaasaata attassiinnarneqarnissanut annertuumik pingaaruteqartoq nalilerneqarpat.

Kapitali 5

Malitseqartitsineq

§ 40. Inuusuttoq innarluutilik Inatsisartut inatsisaat manna naapertorlugu tapersersorneqartooq 16-inik ukioqalerpat, kommunalbestyrelsi malitseqartitsinissamut piareersaasassaaq.

Imm. 2. Naalakkersuisut malitseqartitsinissaq, tamatumani qanoq annertutigisumik, qanoq sivisutigisumik qanorlu iliornikkut malitseqartitsinissaq pillugu malittarisassanik erseqqissunik aalajangersaasinnaapput.

§ 41. § 40 malillugu piareersaanissaq suliffeqarfiit assigiinngitsut aqqutigalugit suliaassaaq tamakkiisumillu isiginnittuussalluni aammalu inuusuttumik taassumalu angajoqqaatut piginnaassuseqartunik imaluunniit akisussaatinneqartunik peqateqarluni ingerlanneqassaaq. Piareersaaneq pisumi pineqartumi oqaatiginiarneqartunit annertunerussanngilaq.

Imm. 2. § 40 naapertorlugu piareersarnek inuusuttumut tunngatillugu pissutsit makku pillugit isummersuutunik tunngaveqassaaq:

- 1) Pisinnaasakinnerulernerup imaluunniit nappaatip kingunerisaanik suliniuteqarnissamut tapersersuinissamillu pisariaqartitsineq.
- 2) Ilinniarneq.
- 3) Suliffeqarneq pilersuinissamullu tunngavissaqarneq.
- 4) Ineqarnermi pissutsit.
- 5) Inuuniarnikkut atugarisat.
- 6) Pissutsit attuumassutillit allat.

Imm. 3. Imm. 1 naapertorlugu ikaarsaariarnissamut piareersarnek naammassineqassaaq, taamaalilluni malitseqartitsineq pillugu kommunalbestyrelsi aalajangiissalluni. Aalajangiineq piffissaagallartillugu aalajangiiffigineqassaaq, taamaalilluni suliniutit inuusuttup 18-inik ukioqalernerata kingorna ingerlaannaq aallartinneqarsinnaallutik. Suliniutit inuup iliuusissatut pilersaarutaani allassimassapput, tak. §§ 24-25.

Kapitali 6

Najukkatut neqeroorut

Najugaqaqatigiiffiit

§ 42. Kommunalborgstyrelsi inunnut innarluutilinnut najugaqaqatigiiffinnik pilersitsillunilu ingerlatsissaaq. Najugaqaqatigiiffik tassaavoq najugaqarfissamik neqeroorut inunnut innarluutilinnut arlaqartunut, taakkulu ulluunerani tapersersorneqarnissamik neqeroorfigineqassapput.

Imm. 2. Naalakkersuisut kommunalbestyrelsimut najugaqaqatigiiffinnik pilersitsinissamik peqqusinnaapput, ima pisoqartillugu:

- 1) inuit marluk amerlanerusulluunniit 18-it sinnerlugit ukiullit, najugaqaqatigiiffimmi inissiamik pissarsinissamut pisinnaatitaasut, kommunimi najugaqarpata, aammalu
- 2) pineqartut ataatsimoorlutik najugaqaqatigiissinnaappata.

Imm. 3. Naalakkersuisut najugaqaqatigiiffiit pillugit aammalu inunnut innarluutilinnut najugaqaqatigiiffimmi inissiamik neqerooruteqartarneq pillugu erseqqinnerusunik maleruagassanik aalajangersaasinnaapput.

Illersugaasumik najugaqaqatigiiffiit

§ 43. Kommunalbestyrelsi inunnut innarluutilinnut najugaqarfinnik illersugaasunik pilersitsillunilu ingerlatsissaaq. Najugaqarfik illersugaasoq tassaavoq najugaqarfissamik neqeroorut inunnut innarluutilinnut arlaqartunut, taakkulu ulloq unnuarlu tamaat tapersersorneqarnissamik neqeroorfigineqassapput.

Imm. 2. Nalaakkersuisut kommunalbestyrelse najugaqarfinnik illersugaasumik pilersitseqqullugu peqqusinnaavaat, najugaqarfinnik illersugaasumi ineqarnissamut pisinnaatitaasunut inunnut marlunnut arlalinnuunniit, 18-it qaangerlugit ukiulinnut utoqqaanerusunulluunniit kommune angerlarsimaffittut kommunigineqarpat.

Imm. 3. Naalakkersuisut najugaqarfiit illersugaasut pillugit maleruagassanik aamma inunnut innarluutilinnut najugaqarfinnik illersugaasumik neqerooruteqarnermik sukumiinerusunik aalajangersaassapput.

Kommunit najugaqarfissamik neqeroorutaannut ataatsimut aalajangersakkat

§ 44. Kommunalbestyrelse inuup kommunimi allami inissisimasumi najugaqaqatigiiffimiinnissamik imaluunniit najugaqarfinnik illersugaasumiinnissamik neqerooruteqartoqassasoq aalajangiippat, kommunalbestyrelsip inuup najugaqaqatigiiffimiinneranut imaluunniit najugaqarfinnik illersugaasumiinneranut aningaasartuutit akilissavai.

§ 45. Kommunalbestyrelsi ataatsimiititaliamik kommunimi najugaqaqatigiiffinnit aamma najugaqarfinnik illersugaasunit tamanit ilaannilluunniit sinniisuuffigineqartumik aamma allanit najugaqaqatigiiffinni najugaqarfinnilu illersugaasuni najugaqartut pillugit tamakkiisumik malinnaanermigut iliuutsinik ataqaqatigiissaarinnermi akuutinneqarnissamik naleqquttutut isigineqartunit sinniisuuffigineqartumik pilersitsisinnaavoq.

Imm. 2. Oqartussat peqataasut suliani aalajangersimasuni suleqaqatigiinnerup ilaatut suliap suliarineqarneranut pingaaruteqarpata, inuk pillugu paasissutissanik paarlaasseqaqatigiissinnaapput, matumani aamma paasissutissat inummut tunngasut mianerisariaqartut ilanngullugit, taamaattorli tak. imm. 3.

Imm. 3. Paasissutissat oqaaseqatigiit siulliit naapertorlugit aatsaat paarlaasseqatigiissutigineqarsinnaapput, inuk suliami pineqartoq imaluunniit angajoqqaatut oqartussaassusillit imaluunniit akisussaataaasoq akuersippata, taamaattorli tak. imm. 4.

Imm. 4. Imm. 3 naapertorlugu akuersissuteqartoqanngippat akuersissummilluunniit pissarsisoqarsinnaanngippat, inuk pineqartoq pillugu paasissutissat, tamatumani paasissutissat mianerisariaqartut ilanngullugit, aatsaat ingerlateqqinneqarsinnaapput, tamanna inuup innarluutillip illersorneqarnissaata qulakkeerneqarnissaanut pisariaqarsorineqarlunilu paasissutissat isertuunneqarnissaannut tunngavissaqarlunnartuusorineqarpat.

Qitiusumik innersuussisarfik

§ 46. Naalakkersuisut qitiusumik innersuussisarfimmik (Qitiusumik Innersuussisarfik) ingerlatsissapput.

Imm. 2. Naalakkersuisut qitiusumik innersuussisarfimmut malittarisassaliorsinnaapput, tassunga ilanngullugit ulloq unnuarlu neqeroorutinit kiisalu Nuna Tamakkerlugu Innarluutilinnut Sullissivimmut innersuussisarnerit.

§ 47. Naalakkersuisut inunnut innarluutilinnut ulloq unnuarlu neqeroorutini inissanik pisariaqartinneqartunik naammaattunik peqarnissaa qulakkiissavaat.

Ulloq unnuarlu neqeroorutit aamma ulloq unnuarlu neqeroorutit illersugaasut

§ 48. Naalakkersuisut inunnut innarluutilinnut ulloq unnuarlu neqeroorutinit pilersitsillutillu ingerlatsissapput, matumani aamma ulloq unnuarlu neqeroorutit illersugaasut ilanngullugit.

Imm. 2. Kommunalbestyrelsi Naalakkersuisut akuersissuteqarnerisigut inunnut innarluutilinnut ulloq unnuarlu neqeroorutinit pilersitsillunilu ingerlatsissinnaavoq, matumani aamma ulloq unnuarlu neqeroorutit illersugaasut ilanngullugit.

Imm. 3. Ulloq unnuarlu neqeroorutit tassaavoq najugaqarfissamik neqeroorut, tassanilu inuit innarluutillit najugaqartarput ulloq unnuarlu tapersersorneqarlutik, paaqqinninneqarlutik aammalu isumassorneqarlutik, ukiumut ullut tamaasa.

Imm. 4. Naalakkersuisut ulloq unnuarlu neqeroorutit aamma ulloq unnuarlu neqeroorutit illersugaasut pillugit erseqqinnerusunik maleruagassanik aalajangersaassapput.

§ 49. Naalakkersuisut inunnut innarluutilinnut ulloq unnuarlu neqeroorutini najugaqartunut, illersugaasumik suliffeqartitsinissamik, sammisaqartitsinissamik katerisimaqqateqartitsinissanillu neqerooruteqartassapput.

§ 50. Kommunalbestyrelse inummut innarluutilimmut Naalakkersuisunit imaluunniit kommunalbestyrelsemit ingerlanneqartumit ulloq unnuarlu najugaqarfiusumik

neqerooruteqassaaq, pineqartoq annertuumik timikkut tarnikkulluunniit
piginnaanikinnerulersimanini pissutigalugu ulluinnarni annertuumik imaluunniit
immikkuullarissamik tapersorneqarnissamik pisariaqartitsippat imaluunniit
paaqqutarineqarnissamik, isumassorneqarnissamik katsorsarneqarnissamilluunniit
pisariaqartitsippat, taakkulu pisariaqartitat allatigut matussuserneqarsinnaangippata.

Ulloq unnuarlu neqeroorummi illersugaasumi inissiineq

§ 51. Innarluutilimmik Kalaallit Nunaanni imaluunniit Danmarkimi ulloq unnuarlu neqeroorummi isumannaallisakkami imatut pisoqarpat inissiisoqarsinnaavoq.:

- 1) Innarluutilimmik angerlarsimaffimmi imaluunniit paaqqinniffimmi tulluurtumi tigusarinninnerup atuutiinnarnissaa pillugu Kalaallit Nunaanni eqqartuussisarnermik inatsimmi § 358, aamma § 361, imm. 2, nr. 3 naapertorlugit eqqartuussivik aalajangiippat.
- 2) Kalaallit Nunaanni eqqartuussisarnermik inatsimmi § 359 kiisalu § 361, imm. 2, nr. 3 naapertorlugit inuup innarluutillip angerlarsimaffimmi imaluunniit paaqqinniffimmi tulluurtumi tigummigallarneqarnissaa pillugu eqqartuussivik aalajangiisimappat.
- 3) Kalaallit Nunaannut Pinerluttulerinermut inatsimmi kapitali 32 imaluunniit 33 naapertorlugit pineqaatissiinissaaq pillugu eqqartuussivik aalajangiippat.

Imm. 2. Kommunimi inuup innarluutillip tigusarineqarnermini aamma tigummigallarneqarnerani najugaqarfigisaani kommunalbestyrelse, pisuni imm. 1, nr. 1-imi pineqartunut ilaasuni, sapinngisamik piaarnerpaamik, politiinit isumannaallisaanikkut isumannaatsutut nalilerneqartumik, angerlarsimaffiup avataani inissiiffissamik pissarsissaaq.

Imm. 3. Inuup innarluutillip tigummineqarallarnermi nalaani kommunimi najugaqarfigisaani, pisuni imm 1, nr 2-mi ilaasuni, piaarnerpaamik, taamaattoq kingusinnerpaamik nalunaaquttap akunnerisa 72-it iluanni, politiinit isumannaallisaanikkut isumannaatsutut nalilerneqartumik, angerlarsimaffiup avataani inissiiffissamik kommunalbestyrelse pissarsissaaq.

Imm. 4. Naalakkersuisut Kalallit Nunaannut pinerluttulerinermut inatsimmi § 240, imm. 2 naapertorlugu kikkut eqqartuussisussaansut pillugit maleruagassanik sukumiinerusunik aalajangersaassapput.

§ 52. Kalaallit Nunaanni Parnaarussivinni aqutsisut Kalaallit Nunaannut pinerluttulerinermut inatsimmi § 234 naapertorlugu angerlarsimaffimmi imaluunniit paaqqinniffimmi naleqquttumi inissiinissamik aalajangiippata, inuit innarluutillit ulloq unnuarlu neqeroorummi isumannaallisakkami inissinneqarsinnaapput.

Ineriartortitsinissamut pilersaarut aamma killiffimmik nalunaarut

§ 53. Ulloq unnuarlu neqeroorummi aqutsisut iliuusissatut pilersaarut aallaavigalugu, §§ 24-25 naapertorlugit, innarluutillip ineriartortinnissaanut pilersaarusiussapput, ulloq unnuarlu

neqeroorummi najugaqarnerup aallartinneranit kingusinnerpaamik qaammatit pingasut qaangiunneranni aammalu kingorna minnerpaamik ukiumut ataasiarluni.

Imm. 2. Imm. 1 naapertorlugu ineriartortitsinermut pilersaarummi ulloq unnuarlu neqeroorummi najugaqarnermi siunertaq anguniakkallu aallaavigalugit perorsaannermik suliaqarneq iliuusissatut anguniakkap anguneqarnissaanut qulakkeerinnittussaq allaaserineqassaaq.

§ 54. Ulloq unnuarlu neqeroorummi aqutsisut kommunalbestyrelsip § 84 naapertorlugu inunnik nakkutilliinermut tunngasuni atugassaanik inuup innarluutillip atukkatigut ineriartornerullu tungaatigut killiffianut tunngasumik §§ 24-25 naapertorlugit iliuusissatut pilersaarussiaq aallaavigalugu nalunaarusiornikkut ilisimatitsissuteqassapput.

Imm. 2. Killiffik pillugu nalunaarusiat ulloq unnuarlu neqeroorummiinnerup aallartinnerata kingorna kingusinnerpaamik qaammatit pingasut qaangiunneranni kommunalbestyrelsinut nassiunneqartassapput. Tamatuma kingorna killiffik pillugu nalunaarusiat imatut nassiunneqartassallutik:

- 1) Inunnut innarluutilinnut 18-it inorlugit ukiulinnut, ukiup affaanut ataasiarluni.
- 2) Inunnut innarluutilinnut 18-inik ukiulinnut utoqqaanerusunullu, ukiumut ataasiarluni.

Imm. 3. Ulloq unnuarlu neqeroorut imm. 2 naapertorlugu killiffik pillugu nalunaarusianik nassiussisarnerup saniatigut, inuk peqqissutsimigut inuttullu atukkatigut pissutsit annertuumik allanngorpata kommunalbestyrelsimut ilisimatitsissaaq.

Ukiumoortumik nalunaarut

§ 55. Naalakkersuisut Inatsisartunut Inatsisartut upernaakkut ataatsimiinnerannut atatillugu ukiumoortumik ataatsimoortumik nalunaarummik tunniussissapput. Nalunaarummi ulloq unnuarlu neqeroorutit pillugit maannakkut killiffik kiisalu ukiumi qaangiuttumi sulinerit pingaarnerit unammilligassallu nassuiarneqassapput.

Imm. 2. Ulloq unnuarlu neqeroorutini aqutsisut ukiumoortumik nalunaarusiamik Naalakkersuisunut, Inatsisartut upernaakkut ataatsimiinnissaannut kingusinnerpaamik qaammat ataaseq sioqqullugu, saqqummiussisassapput.

Imm. 3. Ukiumoortumik nalunaarusiornermut maleruagassanik erseqqinnerusunik Naalakkersuisut aalajangersaasinnaapput.

Periusissiorneq

§ 56. Naalakkersuisut ukiut marlukkaarlugit ulloq unnuarlu neqeroorutit suliassa qarfianni ineriartortitsinermut tunngatillugu nunamut tamakkerlugu siusinnerusumut periusissiamut malitseqartitsisumik periusissiamik sularinnittassapput.

Imm. 2. Periusissiami makku pineqarput:

- 1) Periusissiamut siusinnerusumut malitseqartitsineq.

- 2) Ulloq unnuarlu neqeroorummik pilersitsineq atorunnaarsitsinerlu.
- 3) Ulloq unnuarlu neqeroorutini ataasiakkaani sullinniakkat kiisalu allannguutissatut kissaatigineqartut.
- 4) Ulloq unnuarlu neqeroorutinit innersuussisarneq pillugu kommunimik suleqateqarneq, matumani najugaqaqatigiiffinnik aamma najugaqarfinnik illersugaasunik suleqateqarneq ilanngullugit.

Imm. 3. Ulloq unnuarlu neqeroorutini pisortat, soqutigisaqaqatigiiffiit attuumassuteqartut aamma innarluutillit peqatigiiffii kiisalu kommunalbestyrelsit Naalakkersuisut periusissanik suliaqarnerminni akuutissavaat.

Kapitali 7

Kalaallit Nunaata avataani najugaqarfissamik neqeroorut

§ 57. Kommunalbestyrelsip qulakkiissavaa inuit innarluutillit, §§ 42, 43 imaluunniit 48 naapertorlugit najugaqarfissamik neqeroorummik neqeroorfigineqartut, Kalaallit Nunaanni najugaqarfissamik neqeroorummi najugaqarnissamik neqeroorfigineqarnissaat, taamaattorli tak. imm. 2.

Imm. 2. Inuup pisariaqartitai Kalaallit Nunaanni naammassineqarsinnaanngippata Kalaallillu Nunaanni naleqquttumik tapersersuinissamut periarfissat tamarmik nungussimappata Naalakkersuisut siusissukkut akuersinerat tunngavigalugu Kalaallit Nunaata avataani najugaqarfissatut neqeroorummik piffissami killilimmi neqeroorutigineqassaaq.

Imm. 3. Naalakkersuisunut inassuteqaat makkuninnga imaqassaaq:

- 1) Suliamik saqqummiineq.
- 2) Iliuusissatut pilersaarut.
- 3) Akuersinermik nalunaarut.
- 4) Kommunalbestyrelsimiit akuersinermut aalajangiinermillu allagaq.
- 5) Oqaaseqaatit nalunaarusiallu suliamut attuumassuteqartut.
- 6) Piginnaasanik allattuiffik immersoriigaq qulaajaanerluunniit.
- 7) Danmarkimi oqartussanit suliamut attuumassuteqartunit tigusaqarnermik allagaq imaluunniit najugaqartitsisinnaanermik allagaq.
- 8) Nakorsap imaluunniit tarnip pissusaanik ilisimasallip misissuinerat. Misissuineq piffissami inuup Kalaallit Nunaata avataani inissinneqarnissaanik inassuteqaateqarnermik sivilisunarpaamik ukiunik pingasunik pisoqaassuseqassaaq.
- 9) Inuup pilersorneqarnerani tunngavigineqartumik allaaserinninneq.

Imm. 4. Naalakkersuisut Kalaallit Nunaata avataani najugaqarfissamik neqeroorummi najugaqarneq pillugu erseqqinnerusunik maleruagassanik aalajangersaasinnaapput, tak. imm. 1.

§ 58. Kommunalbestyrelsi Kalaallit Nunaanni najugaqarfissamik neqeroorummik naleqquttumik nassaarpat, imaluunniit Kalaallit Nunaata avataani utaqqiisaasumik

najugaqarneq unitsinneqarpat, kommunalbestyrelsip innarluutilimmut Kalaallit Nunaanni naleqquttumik najugaqarfissamik neqeroorut imaluunniit tapersersuineq neqeroorutigissavaa.

§ 59. Kommunalbestyrelsip Kalaallit Nunaanni ingerlanneqarsinnaanngitsumik innarluummut tunngatillugu piginnaanngorsarnissamik pisariaqartitsippat imaluunniit piginnaanngorsaqqinnissamik suliniuteqarfigineqarnikkut pisariaqartitsippat, innarluutillip Kalaallit Nunaata avataani ulloq unnuarlu piffissami killilikkami najugaqarnissaanik neqeroorfigisinnaavaa. Kalaallit Nunaata avataani ineqarnissamut najugaqarnissaq pillugu neqerooruteqarnermi Naalakkersuisut siumut akuersinissaat piumasaqaataavoq.

Imm. 2. Naalakkersuisut Kalaallit Nunaata avataani utaqqiisaasumik najugaqarneq pillugu erseqqinnerusunik maleruagassanik aalajangersaasinnaapput, tak. imm. 1.

Kapitali 8

Tapersersuinerup aamma najugaqarfissamik neqeroorutip allanngortinneqarnera aammalu unitsinneqarnera

§ 60. Kommunalbestyrelsip najugaqarfissatut neqeroorummi najugaqarnerup unitsinneqarnissaanik imaluunniit najugaqarfissatut neqeroorummut allamut nuussinissamik aalajangiisoqartinnagu uku qulakkiissavai:

- 1) inuup najugaqarfissatut neqeroorummi najugaqarunnaarnerata najugaqarfissatulluunniit neqeroorummut allamut nuunnerata kingorna pisariaqartitai tunniussinnaajumallugit naleqquttumik tapersersorneqassaaq.
- 2) inuup najugaqarfissatut neqeroorummi najugaqarunnaarnerata najugaqarfissatulluunniit neqeroorummut allamut nuunnerata kingorna tapersersorneqarnissaa pillugu iliuusissatut pilersaarusiortoqarsimanissaa,
- 3) inummik tassungalu angajoqqaatut piginnaaneqartitaasumik imaluunniit akisussaatitaasumik oqaloqateqartoqarsimanissaa, aamma
- 4) najugaqarfissatut neqeroorummit allakkatigut oqaaseqaammik inuup innarluutillip najugaqarfissatut neqeroorummi najugaqarunnaarnissaanik aalajangilersaarnermut inuullu innarluutillip pineqartup inuunermi atukkatigut qanoq killiffeqarneranut sulilu pisariaqartitaanut tunngasortalimmik pissarsisoqarsimanissaa.

Imm. 2. Kommunalbestyrelsip, meeqqap innarluutillip ulloq unnuarlu neqeroorummi najugaqarnerata unitsinneqarnissaa pillugu aalajangiisoqannginnerani, imm. 1-imi piumasaqaatit saniatigut qulakkiissavaa:

- 1) meeqqamut, angajoqqaatut oqartussaassusilinnut imaluunniit akisussaatitaasumut kiisalu meeqqap attaveqarfigisartagaannut pisariaqartitsineq naapertorlugu tapersersuinissamik piareersarneqarsimasoq, piffissami ulloq unnuarlu neqeroorummi najugaqarnerup unitsinneqarnissaa sioqqullugu aammalu unitsinneqareernerata kingorna.

2) meeraq aamma angajoqqaatut oqartussaassusillit imaluunniit akisussaatitaasoq aammalu qanigisaasut allat ulloq unnuarlut neqeroorummi najugaqarnerup unitsinneqarnissaa pillugu piareersarluarsimassasut.

Imm. 3. Najugaqarfissatut neqeroorut imm. 1, nr. 4 naapertorlugu oqaaseqaateqarpat, tassanilu inuk najugaqarfissatut ineqarfimmi najugaqaannassasoq inassuteqaatigineqarpat, kommunalbestyrelsip Pissassarfik § 13, imm. 1, nr. 7 naapertorlugu oqaaseqaateqartissavaa. Kommunalbestyrelsip najugaqarfissatut neqeroorummi ineqarnerup unitsinneqarnissaa pillugu aalajangiinnginnermi Pissassarfiup oqaaseqaataata tigunissaa utaqqissavaa.

§ 61. § 63, imm. 1 malillugu najugaqarfissatut neqeroorummi najugaqarnermik unitsitsineq imaluunniit najugaqarfissatut neqeroorummut allamut nuutsitsineq sivikinnerpaamik sapaatit akunneri aqqaneq marluk sioqqullugit nalunaarutigineqassaaq, pisariaqaranili ima pisoqarsimappat:

- 1) inuup innarluutillip imaluunniit taassumunnga akisussaatitaasup imaluunniit angajoqqaatut oqartussaassusillit najugaqarnerup unitsinneqarnissaa erseqqissumik allaganngorlugulu akuerisimappassuk,
- 2) inummik innarluutilimmik mianerinninnissap siumut nalunaaruteqarnissamut piffissaliussap saneqqunneqarnissaa pisariaqartippagu, imaluunniit
- 3) nalunaarutiginissaanut piffissaliussap eqquutitinnigitsoortariaqarneranik kinguneqartitsisunik allanik pingaarutilinnik eqqumaffigisariakkanik peqarpat.

§ 62. §§ 60-61-imi aalajangersakkat inuup innarluutillip Kalaallit Nunaata avataani najugaqarfissamik neqeroorummi najugaqarnerata unitsinneqarnissaa imaluunniit Kalaallit Nunaanni imaluunniit Kalaallit Nunaata avataani najugaqarfissamik neqeroorummut allamut nuunneqarnissaa pillugu kommunalbestyrelsip aalajangiineranut taamatuttaaq atuupput, taamaattorli tak. § 58. Inuup innarluutillip kommunimi angerlarsimaffigisaani kommunalbestyrelsip najugaqarnerup unitsinneqarnissaa imaluunniit najugaqarfissamik neqeroorummut allamut nuunneqarnissaa pillugu aalajangiisoqannginnerani, Kalaallit Nunaata avataani najugaqarfisami kommunimit allaganngorlugu nassuiaammik pissarsiniassaaq, tak. § 59.

§ 63. Kapitali 8-mi aalajangersakkat malillugit, inummik innarluutilimmik tapersersuineq allanngortinneqassanersoq atorunnaarsinneqassanersorluunniit pillugit kommunalbestyrelse aalajangiissaaq, tapersersuinerup inuup pisariaqartitaanut naammassinniffiusinnaajunnaarnera kommunalbestyrelsip ilisimalerpagu.

Imm. 2. Tapersersuinerup allanngortinneqarnissaa imaluunniit unitsinneqarnissaa pillugu aalajangiisoqannginnerani, kommunalbestyrelsip inuk innarluutilik aammalu angajoqqaatut oqartussaassusillit imaluunniit akisussaatitaasoq oqaloqatigereersimassavai, tak. § 23.

Imm. 3. Tapersersuinerup unitsinneqarnissaa pillugu aalajangiisoqannginnerani kommunalbestyrelsi inuup innarluutillip iliuusissatut pilersaarutaa suliarisimassavaa, tak. §§ 24-25.

Kapitali 9

Pinaveersaartitsineq aamma illersuineq

Peqqinnissaqarfimmut innersuussineq

§ 64. Angajoqqaatut oqartussaassuseqartoq imaluunniit akisussaatitaasoq innarluutilimmik inummik nammineerluni aalajangiisinnaassuseqanngitsumik, ilanngullugu meeqqamik imaluunniit inuusuttumik, inuunermik ulorianartorsiortitsisinnaasumik nappaammik imaluunniit nappaammik inummut annertuunik aammalu piffissami sivisuumi piginnaasatigut appariarnermik kinguneqarsinnaasumik misissortinneqarnissamut imaluunniit katsorsarneqarnissamut periarfissiiumanngippat, kommunalbestyrelsi angajoqqaatut oqartussaassuseqartup imaluunniit akisussaatitaasup akuersineratigut aalajangiisinnaavoq, inuk nammineerluni aalajangiisinnaassuseqanngitsoq innarluutilik peqqinnissaqarfimmut innersuunneqassasoq, misissuinissamik imaluunniit katsorsaanissamik pisariaqartitsineq pillugu nalilersuisoqarnissaa siunertaralugu.

Imm. 2. Kommunalbestyrelsi angajoqqaatut oqartussaassuseqartut imaluunniit akisussaatitaasup akuersissuteqarnerat pisariaqartinnagu aalajangiisinnaavoq meeraq, inuusuttoq imaluunniit inuk innarluutilik nammineerluni aalajangiisinnaassuseqanngitsoq peqqinnissaqarfimmut innersuunneqassasoq, misissuinissamik imaluunniit katsorsaanissamik pisariaqartitsineq pillugu nalilersuisoqarnissaa siunertaralugu, taamaalioritoqanngippat inuup pineqartup tarnikkut timikkullu ataavartumik pisinnaasakinnerulerneranik kinguneqartumik navianartorsiorataannaasoq qularnanngippat.

Kinguaassiuutitigut kannguttaatsuliornissamik pinaveersaartitsineq

§ 65. Inummut innarluutilimmut kinguaassiuutitigut kannguttaatsuliornissamik pinaveersaartitsiniarnermi ulloq unnuarlu neqeroorummi aqutsisut sulisut immikkut maluginiagassanut ukuninnga eqqumaffeqaqqullugit ilitersussavaat:

- 1) Pinaveersaartitsinermik suliaqarnermi ataatsimut naleqartitanik tunngaveqarnissaq.
- 2) Pasitsaassaqarnermi pinaveersaartitsinermut iliuseqarnissamullu suleriaatsit.
- 3) Kinguaassiuutitigut atonerluisarnernut aarlerinaataasinnaasut pillugit ataatsimut ilisimasaqarneq.
- 4) Inuup innarluutillip atugarliorneranut ersiutit, taakkunani pissusilersornikkut timikkullu sunniutit ilanngullugit.
- 5) Kinguaassiuutitigut atonerlunneqarnermut timikkut tarnikkullu ersiutit.

Kinguaassiuutinut tunngasuni politikki

§ 66. Inunnut innarluutilinnut najugaqarfissatut neqeroorutini aqutsisut kinguaassiuutinut kinguaassiuutitigullu kannguttaatsuliornissamik pinaveersaartitsinermut tunngasuni erseqqissumik paasiuminartumillu politikkiussapput. Kinguaassiuutinut tunngasuni politikki kajungissuseqarnerup inuit kikkulluunniit inuunerannut immikkullu pisariaqartitaannut ilaalluinnartuunerannik paasititsiissutissanut ilaassaaq. Kinguaassiuutinut tunngasuni politikki inunnut innarluutilinnut atonerluinissamik pinaveersaartitsissaaq.

Imm. 2. Kinguaassiuutinut tunngasuni politikki ilaatigut makkuninnga imaqassaaq:

- 1) Peqqinnartumik kinguaassiuutitigut inooqatigiinnikkullu inuuneqarnissaq pillugu inunnut innarluutilinnut siunnersuisarneq ilitsersuisarnerlu.
- 2) Naartunaveersaatit pillugit siunnersuisarneq ilitsersuisarnerlu.
- 3) Kinguaassiuutitigut atoqatigiinnissamut akuersisarneq pillugu siunnersuisarneq ilitsersuisarnerlu.
- 4) Inuup killiliisinnaanera pillugu siunnersuisarneq ilitsersuisarnerlu.
- 5) Inunnut innarluutilinnut, najugalinnut allanut sulisunullu qaninngoornissamut kinguaassiuutitigullu pissusilersornissamut killiliinerit allat pillugit.
- 6) Najugaqarfissatut neqeroorutit kinguaassiuutitigut kannguttaatsuliornissamik pinaveersaartitsineq.
- 7) Najugaqarfissatut neqeroorutit kinguaassiuutitigut kannguttaatsuliortoqarsimaneranik ilisimanninnermi pasitsaassinermiluunniit erngertumik iliuuseqarneq.
- 8) Kannguttaatsuliortoqarsimaneranik nalunaarutiginninneq unnerluutiginninnerluunniit.
- 9) Sulisut suliatigullu ilisimasallit allat tungaanniit inummut kannguttaatsuliorfigineqarsimasumut tapersersuineq.
- 10) Inuk innarluutilik kinguaassiuutitigut atonerlunneqarsimanersoq pillugu ilisimalikkanik imaluunniit pasitsaassinernik peqartoqalersillugu iliuuseqarneq.

Imm. 3. Inuk innarluutilik kinguaassiuutitigut atonerlunneqarsimanersoq pillugu ilisimalikkanik imaluunniit pasitsaassinernik peqartoqalersillugu iliuuseqarneq pillugu Naalakkersuisut malittarisassanik erseqqinnerusunik aalajangersaasinnaapput.

Kapitali 10

Nalunaarutiginninneq aamma malitseqartitsineq

Nalunaarutiginnittussaataaneq

§ 67. Inuup innarluutillip atugarissaarneranut, peqqissusaanut imaluunniit ineriartorneranut navianartorsiortitsisumik atugaqartinneqartoq innuttaasup paasiguniuk, innuttaasup kialluunniit kommunalbestyrelsemut nalunaaruteqarnissani pisussaaffigaa.

Imm. 2. Nalunaarutiginninneq tiguneqarpat kommunalbestyrelse sapaatip akunnera qaangiutsinnagu innuttaasumut allakkatigut ilisimatitsissaaq nalunaarutiginninneq tigusimallugu.

§ 68. Isumaginnittoqarfinni, peqqinnissaqarfinni ilinniartoqarfinnilu sulisut, inuk innarluutilik tapersorsorneqarnissamik pisariaqartitsisoq, inuussutissarsiutigalugu sulinerminnut atatillugu sulisup paasiguniuk imaluunniit ilimaginissaanut pissutissaqaruni, ingerlaannaq kommunalbestyrelsemut nalunaaruteqarnissamik sukannernerusumik pisussaaffeqarput. Nalunaarutiginnittussaataaneq taanna, innuttaasunit tamanit qinerneqarlutik suliaqartunut imaluunniit inuiaqatigiinni sullissillutik suliaqartunut, atuuppoq.

Imm. 2. Nalunaarutiginninnerup tighenerata kingorna sapaatip akunnera 1 qaangiutsinnagu kommunalbestyrelse nalunaarutiginninnerup tigheneqarsimanera pillugu sulisumut nalunaarutiginnittumut allakkatigut uppersaammik nassiussissaaq.

§ 69. Kommunalborgstyreliip kommune nuuffigineqartoq allakkatigut nalunaarfigissavaa:

- 1) § 29 malillugu inuk innarluutilik nammeneq angerlarsimaffimmini ulluinnarni ikiorneqarlunilu isumassorneqartoq, imaluunniit § 30 malillugu nammeneq angerlarsimaffimmini paarineqartoq kommunimut allamut nuuppat, aamma inuk innarluutilik Inatsisartut inatsisaat manna malillugu suli tapersorsorneqarnissamik pisariaqartitsisoq kommunalborgstyreliise isumaqarpat,
- 2) kapitali 6 imaluunniit 7-mi, malillugit inuk innarluutilik najugaqarfissatut neqeroorummut inissinneqartoq, nammeneq piumassutsini malillugu kommunimut allamut nuuppat, aamma
- 3) inuk innarluutilik nammeneq toqqakkaminik kommuninut allamut nuuppat, tamannalu kapitali 4-mi, 6-im 7-imiluunniit aalajangersakkat naapertorlugit naleqquttumik tapersorsorneqarneeruppat tamanna navianartorsiorderanik kinguneqarsinnaasutut nalilerneqarpat.

Imm. 2. Imm. 1 malillugu nalunaarutiginninnermut atatillugu kommunip qimanneqartup suliassami najoqqutassat attuumassuteqartut nassiutissavai, matumani paasissutissat attuumassuteqartut eqikkarneqarnerat, tapersorsorneqarnissamik pisariaqartitsinermik naliliinnermut kommunip qimanneqartup tunngavigisimasai, ilanngullugit.

Imm. 3. Imm. 1–2 aamma atuutissapput kommunimut imaluunniit oqartussaasumut assingusumut Kalaallit Nunaanni avataaniittumut tunngatillugu, nuunneq Kalaallit Nunaanniit ingerlanneqassappat, aammalu inuk innarluutilik imaluunniit taassumunnga angajoqqaatut oqartussaassusillit imaluunniit akisussaataasooq tamatumunnga akuersippata.

Kommunip iliuuseqarnissamut pisussaaffia

§ 70. Kommunalborgstyrelii nalunaarutiginninnerup tigheneranit kingusinnerpaamik nalunaaquttap akunneri 48-t qaangiutsinnagit, innarluutilimmik inummut tunngasoq, takuuk §§ 67, 68 imaluunniit 69, nalilersuissaaq inuk peqqinnissaa imaluunniit ineriartornera

ulorianartorsiortinneqarnersoq, taamaattumillu innarluutilimmut sukumiisumik piaartumik suliniuteqarnissaq pisariaqartinneqarnersoq.

Imm. 2. Kommunalbestyrelsi naliliippat innarluutilimmut piaartumik iliuseqarnissamik aallartitsinissaq pisariaqartinneqanngitsoq, kommunalbestyrelsi piaarnerpaamik, taamaattorli kingusinnerpaamik ullut suliffiusut tallimat iluanni aalajangiissaaq, misissuineq aallartinneqassanersoq tunngavissaqarnersoq pillugu, takuuk § 18.

Imm. 3. Kommunalbestyrelsi aalajangiippat misissuineq aallartinneqassasoq, takuuk imm. 1, misissuineq piaarnerpaamik aallartinneqassaaq aammalu kingusinnerpaamik nalunaarutiginninnerup tiguneranit sapaatit akunneri marluk qaangiutsinnagit aallartinneqassalluni.

§ 71. Kommunalbestyrelsi nalunaarutiginninnernik tigusaqarpat, tak. §§ 67, 68 imaluunniit 69, inummut innarluutilimmut tunngasunik, taanna pillugu kommunalbestyrelsi siusinnerusukkut iliuseqarfiginnereersimappat, suliaq kommunalbestyrelsimit nalilersorneqaqqissaaq.

§ 72. Inuk innarluutilik §§ 67, 68 imaluunniit 69 malillugit nalilersuinnermut atugassatut oqaloqatigineqarsinnaavoq

Imm. 2. Oqaloqatigiinneq, takuuk imm. 1, pisinnaavoq inummut nammineerluni aalajangiisinnaassuseqanngitsumut innarluutilimmut angajoqqaatut oqartussaassuseqartut imaluunniit akisussaaitaasup akuersissuteqarnerat pinngikkaluarlugu aammalu taakkua najuutinngikkaluarlutik, kommunalbestyrelsip nalilerpagu innarluutilimmut iluaqutaassasoq.

Imm. 3. Oqaloqatigiinneq, tak. imm. 1, ingerlanneqanngiinnarsinnaavoq, inuup innarluutillip inerisimasussaa imaluunniit suliap qanoq issusia oqaloqatigiinnissamut ilalernanngissutaasorinarpat.

Imm. 4. Inuk innarluutilik 18-it ataallugit ukioqarpat meeqqat tapersersorneqarnissaannut Inatsisartut inatsisaanni § 19 naapertorlugu isumaginninnermi misissuinnerup aallartinnissaanut tunngavissaqarnersoq aalajangiisoqassaaq.

§ 73. Nalunaarummik inummut innarluutilimmut paarsinerluttoqarsimaneranik, nakuusertoqarsimaneranik imaluunniit kinguaassiuutitigut kannguttaatsuliortoqarsimaneranik kommunalbestyrelsep pasilliuteqarneranut pissutaasumik anngussaartoqarsimatillugu, § 18 naapertorlugu qulaajaanissaq aamma § 16, imm. 5 naapertorlugu tapersersuigallarnissaq nalunaarutip tiguneraniit nalunaaquttap akunneri 48-t qaangiutsinnagit sulissutigineqalissapput.

Imm. 2. Inummut innarluutilimmut kannguttaatsuliortoqarsimaneranik nalunaarutiginnittoqarsimatillugu inuk innarluutilik pineqartoq kommunalbestyrelsimit oqaloqatigineqassaaq. Inummut innarluutilimmut kannguttaatsuliortoqarsimaneranik angajoqqaatut oqartussaassuseqartumit ataatsimit imaluunniit marlunnit

nalunaarutiginnittoqarsimatillugu, oqaloqatigiinneq angajoqqaatut oqartussaassuseqartut akuersiteqqaanngikkaluarlugit peqataatinngikkaluarlugillu ingerlanneqassaaq.

Imm. 3. Nalunaarutiginninneq, takuuk imm. 1, kommunimut pasitsaassilersitsippat innarluutilik sumiginnagaasinnaasoq, persuttaaffigineqarsinnaasoq imaluunniit kinguaassiuutitigut kannguttaatsuliorfigineqarsinnaasoq, kommunalbestyrelsi tigusimasaminik nalunaarutiginninneq pillugu ingerlaannaq politinut nalunaarutiginnissaaq.

§ 74. Kommunalbestyrelsip inuk innarluutilik paarinerlunneqartoq, nakuuserfigineqarsimasoq kinguaassiuutitigulluunniit atonerlunneqarsimasoq nammineerluni paasippagu kommunalbestyrelsip §§ 70-73 naapertorlugit iliuuseqarnissamut pisussaaffia taamatuttaaq atuupput.

Kapitali 11

Tikeraarluni angalanerit aamma toqusup timaanik angallassineq

Meeqqat tikeraarluni angalaneri

§ 75. Meeraq innarluutilik ulloq unnuarlu neqeroorummi inissinneqarsimasoq, takuuk § 50, meeqqap najugaqarfigisaanit avataaniittoq, ukiumut marloriarluni akiliunneqarluni tikeraarluni angalanissamut pisinnaatitaaffeqarpoq, nammineq najugaqarfigisaminut imaluunniit qanigisaasunut, angajoqqaatut oqartussaassuseqartunut imaluunniit akisussaataasumut. Inuk innarluutilik ukiumi 18-inik ukioqalerfiani, ukiup ingerlanerani marloriarluni akiliunneqarluni tikeraarluni angalanissamut pisinnaatitaaffeqarpoq.

Imm. 2. Tikeraarluni angalanissaq meeqqap pitsaanerpaamik iluaqutaanik nalilerneqarpat, angajoqqaatut oqartussaassuseqartunut imaluunniit akisussaataasumut, imaluunniit qanigisaasunut ataatsimut imaluunniit marlunnut tunniunneqarsinnaavoq, taakkua meeqqamik ulloq unnuarlu neqeroorummi tikeraarnissaat siunertaralugu.

Imm. 3. Meeqqamut innarluutilimmut tikeraarluni angalanermik 1-mik suli tunniussisoqassaaq, meeqqap angajoqqaatullu akisussaasut akornanni attaveqarnissaq pisariaqartinneqarpat, aamma meeqqap pisariaqartitaanut naleqquppat.

Imm. 4. §§ 57 imaluunniit 59 malillugit meeqqamut innarluutilimmut Kalaallit Nunaata avataanut inissinneqarsimasumut imm. 1-3-mi tikeraarluni angalasarneq pillugu aalajangersakkat assinganik atuutsinneqarput.

Imm. 5. Tikeraarluni angalanissaq imm. 1 aamma imm. 3-4 naapertorlugu najugaqarfimmut qanittumi illoqarfimmut tunniunneqarsinnaavoq, kommunalbestyrelsip nalilerpagu najugaqarfimmut angalanissaq periarfissaqanngitsoq pissutigalugu tikikkuminaassuseq, ikorsiissutit periarfissaannginnerat imaluunniit najugaqarfimmi atortorissaarutit amigaatigineqartut. Tamatuma peqatigisaanik angalanermut ineqartitaanermullu aningaasartuutit illoqarfimmut tassunga qanigisaasunut amerlanerpaamik marlunnut tunniunneqassapput.

Imm. 6. Tikeraarluni angalanissamut pisinnaatitaaffik, takuuk imm. 1 aamma imm. 3–4, meeqqanut innarluutilinnut ulloq unnuarlu neqeroorummi inissinneqarsimasunut eqqartuussut imaluunniit eqqartuussiviup aalajangiinera naapertorlugu atuutinngilaq. Tikeraarluni angalanissaq angajoqqaatut oqartussaassuseqartunut imaluunniit akisussaataasumut, imaluunniit qanigisaasunut ataatsimut imaluunniit marlunnut tunniunneqarsinnaavoq, takuuk imm. 2, eqqartuussut imaluunniit eqqartuussiviup aalajangiinera taamaaliornissamut periarfissiippat.

Inersimasunut tikeraarluni angalanerit

§ 76. Inuk innarluutilik 18-it sinnerlugit ukiulik najugaqarfimmi neqeroorummi najugaqartoq nammineq najugaqarfigisaminut avataaniittumi ukiumut ataasiarluni akiliunneqarluni tikeraarluni angalanissamut pisinnaatitaaffeqarpoq, nammineq najugaqarfigisaminut imaluunniit qanigisaasunut imaluunniit akisussaasumut, takuulli imm. 4 aamma 5.

Imm. 2. Inuk innarluutilik nammineerluni angalanissamut pisinnaanngippat imaluunniit ajornakusoortumik angalasinnaappat, tikeraarluni angalanissaq qanigisaasunut ataatsimut imaluunniit marlunnut imaluunniit sinniisumut tunniunneqassaaq, taamaalillutik qanigisaasut imaluunniit akisussaataasooq najugaqarfimmi neqeroorummi inummut innarluutilimmut tikeraarsinnaassallutik, inuk innarluutilik tamanna kissaatigippagu.

Imm. 3. Imm. 1-2 malillugit tikeraarluni angalanerit pillugit aalajangersakkat inunnut innarluutilinnut Kalaallit Nunaata avataani ulloq unnuarlu neqeroorummiittunut taamaaqataanik atuupput, takuuk § 57 imaluunniit § 59.

Imm. 4. 18-it 24-llu akornanni ukiulik, Kalaallit Nunaata avataani ulloq unnuarlu neqeroorummi najugaqarallartitaasooq nunagisaminut ukiumut marloriarluni akiliunneqarluni tikeraarnissaminut pisinnaatitaaffeqarpoq. Ukiumi 24-liiffissamini akiliunneqarluni marloriarluni tikeraarsinnaatitaavoq.

Imm. 5. Imm. 1 aamma 3 naapertorlugit angalasussap nunagisaanut angalanissamut aqutissat ajornakusoorpata nunagisaanilu ikorfartuutitigut najugaqarfissatigullu periarfissakippat, angalasussaq illoqarfimmut nunagisami eqqaaniittumut tikeraarsinnaatitaavoq. Angalasussap qanigisaata ataatsip marlulluunniit imaluunniit akisussaasuusuaata angalaqataanermut unnuinermullu aamma akiliunneqarsinnaapput.

Imm. 6. Imm. 1-4 naapertorlugit tikeraarsinnaatitaaneq, inunnut innarluutilinnut pineqaatissinneqarnikkut eqqartuussiviulluunniit aalajangigaanik ulloq unnuarlu neqeroorummiittussanngortinneqarsimasunut atuutinngilaq.

Tikeraarluni angalanernut imaluunniit feeriarnissamut aningaasatigut tapersersorneqarneq

§ 77. Angalanermut kiisalu ullut unnuallu 9-t tikillugit unnuiffissanut aningaasartuutit inuup innarluutillip kommunimi angerlarsimaffigisaani kommunalbestyrelsip akilissavai.

Tikeraarluni angalanerup aallartinnerani naanerani angalanerup sivilissusia ulloq unnuarlu 9-nut taaneqartunut ilanngullugit naatsorsuiffiqineqassanngillat.

Imm. 2. Tamatuma saniatigut kommunalbestyrelsi makku aningaasartuutigissavai:

- 1) inummut innarluutilimmut pisarialimmik tapersersuinernut, soorlu §§ 75 aamma 76 malillugit tikeraarluni angalanernut atatillugu ingiaqateqarnermut tapiissuteqarnissamullu iliuusissat immikkut ittut.
- 2) angalanerup nalaani ingiaqataasunut, kiisalu ingiaqataasut angerlarsimaffiisa aamma najugaqarfissatut neqeroorutip akornanni angalaneq, aamma
- 3) § 75, imm. 2 aamma § 76, imm. 2 malillugit angajoqqaatut oqartussaassusillit, akisussaatisaasut imaluunniit qanigisaasut allat angalanerannut inissaqartinnissaannullu aningaasartuutit.

Imm. 3. Inummut innarluutilimmut pisariaqartitsineq tunngavigalugu ingiaqataasussat amerlassusissaat aalajangerneqassaaq.

Imm. 4. Naalakkersuisut tikeraarluni angalanerit pillugit kiisalu kommunalbestyrelsit aningaasartuutitut imm. 1-3 naapertorlugit akiliinissaat matussusiinissaallu pillugit malittarisassanik aalajangersaasinnaapput.

§ 78. Innarluutilik Kalaallit Nunaanni najugaqarsimappat, §§ 75-imi imaluunniit 76-imi pineqartunut ilaangippat, taannalu nammineq akilikkaminik sulinngiffeqarpat, ingiaqateqarnanilu sulinngiffeqarsinnaanngippat, kommunalbestyrelsi ullut 9-t tikillugit ingiaqateqarnissaq ikiorsiissutigisinnaavaa. Tikeraarluni angalanerup aallartinnera naaneralu ulluni unnuanilu 9-ni pineqartuni ilaatinneqassanngillat.

Imm. 2. Naalakkersuisut kommunalbestyrelsit aningaasartuutit akileraat kiisalu aningaasartuutit matussuserneqarnissaat pillugit malittarisassanik aalajangersaasinnaapput.

Napparsimanermi imaluunniit toqusoqarnerani tikeraarneq

§ 79. Innarluutilik § 75 imaluunniit § 76 naapertorlugit tikeraarluni angalasinnaatitaavoq, aammattaaq qanigisaasup perululluni napparsimanerani, toqunerani imaluunniit ilisaaneranut atatillugu Kalaallit Nunaannut imaluunniit Kalaallit Nunaata iluani angalanerup 1-imut akiliunneqarnissaminut pisinnaatitaavoq.

Imm. 2. Kommunalborgstyrelsi angalanerup aningaasartuutit aamma ineqartitaanerup aningaasartuutit ullunut 9-nut tikillugit akilissavai. Tikeraarluni angalanerup aallartinnerani naammassineranilu angalanerup atorineqartoq piffissaq ullunut 9-nut ilanngunneqassanngilaq. Kommunalborgstyrelsi tikeraarluni angalanerup imm. 1 naapertorlugu makku aningaasartuutit matussuserneqarnissaat isumagissavaa:

- 1) Angalanerup imm. 1 naapertorlugu pisariaqartumik tapersersorneqarnerup aningaasartuutit, ilanngullugit ingiaqataanerup kiisalu angalanerup atatillugu tapersersuinernut aaqquissuussinerit.

2) Angalanerup nalaani ingiaqataasunut aningaasartuutit kiisalu ingiaqataasup angerlarsimaffianit najugaqarfimmi neqeroorummot angalaneranut aningaasartuutit.

Imm. 3. Ingiaqataasussat amerlassusissaat inummut innarluutilimmut pisariaqartitsineq tunngavigalugu aalajangerneqassapput.

Imm. 4. Naalakkersuisut tikeraarluni angalanerit pillugit kiisalu kommunalbestyrelsit aningaasartuutitut imm. 1-3 naapertorlugit akiliinissaat matussusiinissaallu pillugit malittarisassanik aalajangersaasinnaapput.

Ulluni immikkut ittuni imaluunniit napparsimarujussuarnermi tikeraarneq

§ 80. Kommunalbestyrelsi Kalaallit Nunaannut imaluunniit Kalaallit Nunaanni angalanissamut tapersersuisinnaavoq, inummut innarluutilimmut qanigisaasunut ataatsimut imaluunniit marlunnut, §§ 75 imaluunniit 76 naapertorlugit tikeraarluni angalanissamut pisinnaatitaaffeqartumut, ullusaqartumut immikkut ittumik pingaarutilimmik nalliuttorsiorfimmi imaluunniit nappaammik annertuumik nalaataqartumut.

Imm. 2. Tikeraarluni angalanerit aaqqissuunneqartarnerat aamma aningaasartuutit akilerneqartarnerat pillugit maleruagassanik Naalakkersuisut aalajangersaasinnaapput.

Toqusup timaanik assartuineq

§ 81. Inuk innarluutilik najugaqarfissatut neqeroorummi, nunagisap avataaniittumi najugaqartoq najugaqarnermini toqukkut qimaguppat, illerfiup assartornissaanut aningaasartuutit tamakkiisumik ilaannakortumilluunniit matussutissaanut kommunalbestyrelse tunniussisinnaavoq.

Imm. 2. Imm. 1-imi aalajangersagaq aatsaat atorineqassaaq toqusup timaanik angallassinermut aningaasartuutit pillugit inatsisini allani malillugit tapersersuisoqarsinnaanngippat.

Kapitali 12

Inuit innarluutillit pillugit siunnersuisoqatigiit aamma politikkiat

§ 82. Kommunalbestyrelsi innarluutillit pillugit siunnersuisoqatigiinnik pilersitsissaaq, taakkua kommunalbestyrelsimut innarluutillit pillugit politikikkut apeqqutitut tunngatillugu siunnersuisassapput aammalu innuttaasut aamma kommunalbestyrelsip akornanni isumaat pillugit attaveqaataassallutik, apeqqutit tamarmik najukkamiittut inunnut innarluutilinnut tunngasut pillugit.

Imm. 2. Kommunalbestyrelsip innarluutilinnut suliniutit pingaarutillit tamaasa pillugit innarluutilinnut siunnersuisoqatigiit tusarniaaffigisassavai.

Imm. 3. Innarluutilinnut siunnersuisoqatigiit apeqqutit inunnut ataasiakkaanut tunngasut suliarisinnaanngilaat.

Imm. 4. Inuit Innarluutillit pillugit Siunnersuisoqatigiit ilaasortanit 4-nit 8-nut amerlassusilinnit inuttaqartassapput, kommunalbestyrelsimit toqqarneqartunit. Ilaasortat innarluutillit peqatigiiffiiniit innersuunneqarsimasuusinnaapput, innarluutillit pillugit soqutigisaqassapput imaluunniit inunnik innarluutilinnik suliaasaqarfimmi suliatigut ilisimasalituttut tunuliaqutaqassapput.

Imm. 5. Innarluutilinnut siunnersuisoqatigiit pisariaqartumik allattoqarfeqarnermut tunngasunik suliaasaataannut kommunalbestyrelse ikiutissaaq.

Imm. 6. Innarluutilinnut siunnersuisoqatigiit suliaqarnerat katitigaanerallu pillugit maleruagassanik erseqqinnerusunik kommunalbestyrelse aalajangersaasinnaavoq.

§ 83. Kommunalborgstyrelsi innarluutillit pillugit politikkimik akuersissuteqassaaq, tassani aalajangersarneqassalluni inunnut innarluutilinnut sullissineq qanoq ittoq pisinnaatitaaffigineqarnerisooq imaluunniit naatsorsuutigineqarsinnaanersoq. Innarluutillit pillugit politikkimik aamma paasissutissiisoqassaaq, kommunalborgstyrelsip qanoq iliorluni qulakkeerniarneraa innarluutillit pillugit eqqarsaat pilersaarusiornermi kommunip iluani suliaasaqarfimmi tamani ilanngunneqarnissaa.

Imm. 2. Innarluutillit pillugit politikki kommunip nittartagaani tamanut saqqummiunneqassaaq kiisalu Naalakkersuisunut ilisimatitsissutitut nassiuunneqassaaq.

Imm. 3. Inuit innarluutillit pillugit politikki sivisunerpaamik ukiut sisamakkuutaarlugit misissorneqartassaaq.

Kapitali 13

Nakkutilliineq

Kommunalborgstyrelsip nakkutilliinissamut pisussaaffii

§ 84. Kapitali 6 imaluunniit 7-imi aalajangersakkat malillugit inummut innarluutilimmut najugaqarfissatut neqeroorummiittumut, inummut sammititamik kommunimi angerlarsimaffigisami kommunalborgstyrelse nakkutilliissaaq. Nakkutilliinermi ilaatillugu, najugaqarfissatut neqeroorummiinnermi inuup timikkut, tarnikkut inooqatigiinnikkullu pisariaqartitai suli naammassineqarnerisut kommunalborgstyrelsip qulakkiissavaa.

Imm. 2. Imm. 1 naapertorlugu inummut tunngasumik nakkutilliinermi kommunalborgstyrelsi najugaqarfimmi neqeroorummi nalunaarutigineqarsimasunik aammalu nalunaarutigineqanngitsunik nakkutilliilluni pulaarnernik ingerlatsisinnaavoq.

Imm. 3. Kommunalborgstyrelsi Naalakkersuisut qinnuteqarnerisigut kommunalborgstyrelsip inummut tunngasumik nakkutilliineq qanoq isumagisarneraa pillugu paasissutissat kissaatigineqartut tamaasa nassiuunneqarnissaat pisussaaffigaa.

Imm. 4. Imm. 1 malillugu inummut sammititamik nakkutilliinermut maleruagassanik erseqqinnerusunik Naalakkersuisut aalajangersaasinnaapput, matumani ilanngullugit:

1) kommunalborgstyrelsip nakkutilliisussaatitaanermi ingerlatsinera,

- 2) inummut tunngasunik nakkutilliinernik aaqqissuussineq,
- 3) nakkutilliisussaatitaanerup naammassineqarnissaanut atugassarititaasut piumasaqaatillu, aamma
- 4) kommunalbestyrelsip nakkutilliinermut nalunaarusianik suliarinninnera.

§ 85. Najugaqaqatigiiffinnut aamma najugaqarfinnut illersugaasunut kapitali 6 malillugu kommunalbestyrelsemit pilersinneqarlutillu ingerlanneqartunut, ingerlatsinermut sammititamik kommunalbestyrelse nakkutilliissaaq.

Imm. 2. Imm. 1 naapertorlugu ingerlatsinermut tunngasumik nakkutilliinermi ilaatillugu kommunalbestyrelsi najugaqarfinmi neqeroorummi nalunaarutigineqarsimasunik aammalu nalunaarutigineqanngitsunik nakkutilliilluni pulaarnernik ingerlatsisinnaavoq.

Imm. 3. Kommunalbestyrelsi Naalakkersuisut qinnuteqarnerisigut kommunalbestyrelsip ingerlatsinermut tunngasumik nakkutilliineq qanoq isumagisarneraa pillugu paasissutissat kissaatigineqartut tamaasa nassiunneqarnissaat pisussaaffigaa.

Imm. 4. Imm. 1 malillugu ingerlatsinermut sammititamik nakkutilliinermut maleruagassanik erseqqinnerusunik Naalakkersuisut aalajangersaasinnaapput, matumani ilanngullugit:

- 1) kommunalbestyrelsip nakkutilliisussaatitaanerminik ingerlatsinera,
- 2) ingerlatsinermut tunngasunik nakkutilliinernik aaqqissuussineq,
- 3) nakkutilliisussaatitaanerup naammassineqarnissaanut atugassarititaasut piumasaqaatillu, aamma
- 4) kommunalbestyrelsip nakkutilliinermut nalunaarusiaanik suliaqartarneq.

Naalakkersuisut nakkutilliinissamut pisussaaffii

§ 86. Qitiusumik nakkutilliinernik ingerlatsivimmik Naalakkersuisut peqassapput (nakkutilliinernik ingerlatsivik).

Imm. 2. Nakkutilliinermut immikkoortortaqaarfik Inatsisartut inatsisaani matumani malittarisassat pillugit kommunalbestyrelsip aqutsineranik qulliunerusumik nakkutilliissaaq.

Imm. 3. § 48-mi aalajangersakkat malillugit ulloq unnuarlu neqeroorutitut pilersinneqarsimasunut ingerlatsinermut sammititamik nakkutilliinernik ingerlatsivik nakkutilliissaaq.

Imm. 4. Nakkutilliinermut immikkoortortaqaarfik imm. 3 naapertorlugu ingerlatsinermut tunngasumik nakkutilliinermi ilaatillugu ulloq unnuarlu neqeroorummi pissutsinik nakkutiginnissaaq aammalu ulloq unnuarlu neqeroorut pillugu kommunalbestyrelsi oqaloqatigalugu suleqatigiinneq ingerlatissallugu.

Imm. 5. Ulloq unnuarlu neqeroorummi ingerlatsinermut tunngasumik nakkutilliinermi ilaatillugu Naalakkersuisut ulloq unnuarlu neqeroorummi nalunaarutigineqarsimasunik aammalu nalunaarutigineqanngitsunik nakkutilliilluni pulaarnernik ingerlatsisinnaapput.

Imm. 6. Naalakkersuisut nakkutilliinermut immikkoortortaqarfiup ingerlatsinermut tunngasumik nakkutilliinerata qanoq aaqqissuuneqarnissaa aamma imarisai pillugit erseqqinnerusunik malittarisassanik aalajangersaasinnaapput.

§ 87. Nakkutilliinermut immikkoortortaqarfik uppersaatinik naammaginartunik takutitsinermigut aammalu eqqartuussiviup aalajangiinera pisariaqartinnagu kommunip ingerlatsiviini paasissutissanut tamanut nakkutilliinermut immikkoortortaqarfiup § 86, imm. 2 naapertorlugu nakkutilliinermi suliasamik naammassinninnissaanut pingaaruteqartunut isersinnaatitaavoq, ilanngullugit inummut tunngasut mianernartut kiisalu allagaatit iluani atorineqartartut.

Imm. 2. Nakkutilliinermut immikkoortortaqarfik ulloq unnuarlu neqeroorummit paasissutissanik pisariaqartunik tigussinnaatitaavoq, taamaalilluni nakkutilliinermut immikkoortortaqarfik § 86, imm. 3 naapertorlugu ingerlatsinermut tunngasunik nakkutilliinernik ingerlatsisinnaassalluni.

§ 88. Nakkutilliinermut immikkoortortaqarfik nakkutilliilluni pulaarnernut atatillugu, takuuk § 86, imm. 2, allakkatigut nakkutilliinermut nalunaarusiamik suliaqartassaaq, tassani kommunalbestyrelsimut ilitersuutaasinnaasunik innersuussutiniq imaqsinnaasumik.

Imm. 2. Nakkutilliinermut immikkoortortaqarfik nakkutilliilluni pulaarnerup kingorna kommunalbestyrelsimut pisussaaffiliisumik peqqussuteqarsinnaavoq makkununga:

- 1) kommunalbestyrelsi Inatsisartut inatsisaani matumani suliat ingerlasut pillugit § 18 naapertorlugu misissuineq aallartissasoq imaluunniit §§ 24-25 naapertorlugu iliuusissatut pilersaarummik suliaqassasoq, aammalu suliniutit taakku nakkutilliinermut immikkoortortaqarfiup piffissaliussaa iluani naammassineqassasut. Nakkutilliinermut immikkoortortaqarfik kommunalbestyrelsimut peqqussuteqarsinnaavoq suliat ingerlasarneri pillugit ingerlaavartumik nakkutilliinermut immikkoortortaqarfimmut ilisimatitsisarnissaanik,
- 2) kommunalbestyrelsi Inatsisartut inatsisaani matumani suliat naammassineqareersut nutarterlugit suliarineqarnissaat pillugu aallartitsissasoq, nakkutilliinermut immikkoortortaqarfiup nalilerpagu kommunalbestyrelsi suliat pineqartut pillugit inatsisitigut kukkunernik iliuuseqarsimasoq, imaluunniit
- 3) kommunalbestyrelsi nakkutilliinermut immikkoortortaqarfiup piffissaliussaa iluani § 18 naapertorlugu misissuineq aallartissasoq, nakkutilliinermut immikkoortortaqarfiup nalilerpagu suliaq ingerlasoq imaluunniit naammassineqareersoq pillugu najugaqarfimmi neqeroorummi najugaqartitsinissaq pisariaqartinneqartoq, kisianni tamanna neqeroorutigineqarsimanngitsoq.

§ 89. Nakkutilliinermut immikkoortortaqarfik ingerlatsinermut tunngasumik nakkutilliinermi atatillugu ulloq unnuarlu neqeroorummi aqutsisunut peqqussuteqartarsinnaavoq. Nakkutilliinermut immikkoortortaqarfik peqqussutip malinneqarnissaanut piffissaliussisinnaavoq.

Imm. 2. Nakkutilliinermut immikkoortortaqarfik ingerlatsinermut tunngasumik nakkutilliinermi atatillugu ulloq unnuarlu neqeroorummi pissutsit tamanna pisariaqartippassuk nakkutilliinermik sakkortusisamik aalajangiisinnaavoq.

Imm. 3. Imm. 2 malillugu nakkutilliinermik ingerlatsivik peqqussuteqarpat imaluunniit annertusisamik nakkutilliinissamik aalajangiippat, kommunalbestyrelsit inissiisimasut nakkutilliinermik ingerlatsiviup nalunaarfigissavai.

Imm. 4. Qaqugukkut annertusisamik nakkutilliinermik aallartitsisoqarsinnaanersoq, aammalu qaqugukkut peqqusissuteqartoqarsinnaanersoq pillugit maleruagassat erseqqinnerusut Naalakkersuisut aalajangersaaffigissavaat.

Kapitali 14

Misiliutaasumik aaqqissuussinerit

§ 90. Naalakkersuisut kommunalbestyrelsip qinnuteqarneratigut akuersissutigisinnaavaat kommunalbestyrelsi tapersersuinernik allanik tunniussisinnaasoq aammalu najugaqarfimmi neqeroorutini allanik pilersitsisinnaasoq, Inatsisartut inatsisaani matumani aalajangersarneqartut saniatigut.

Imm. 2. Naalakkersuisut akuersissuteqarsinnaapput, takuuk imm. 1, misiliutaasumik aaqqissuussinertut annerpaamik ukiuni pingasuni atuuttussatut.

Imm. 3. Kommunalbestyrelsi misiligutaasumik aaqqissuussineq pillugu ukiumoortumik naliliinermik suliaqartassaaq, takuuk imm. 2, taanna Naalakkersuisunut tunniunneqassaaq.

Imm. 4. Naalakkersuisut akuersissuteqarnerminni tapersersuinernik aammalu najugaqarfimmi neqeroorutini akuersissutip tunngaffigisaannik nakkutilliineq pillugu aalajangersakkanik aalajangersaasinnaapput.

Kapitali 15

Aningaasaqarneq aamma akigititat

Aningaasalersuineq

§ 91. Inatsisartut inatsisaat manna malillugu inunnut innarluutilinnut tapersersuinermut aningaasartuutit kommuninit akilerneqassapput.

Imm. 2. Inatsisartut inatsisaat manna malillugu ulloq unnuarlu neqeroorutit pilersinneqarnerannut ingerlanneqarnerannullu attuumassuteqartut Naalakkersuisunit akilerneqartassapput.

Imm. 3. § 92 malillugu ulloq unnuarlu neqeroorutit ingerlanneqarnera kommunit akigititanut akiliutai aqqutigalugit aningaasalersorneqassaaq.

Imm. 4. Kommunit namminneq aningaasartuutit tamaasa akilissavaat Inatsisartut inatsisaanut matumunnga naapertorlugit nammineq najugaqarfimmi neqeroorutini pilersitsinermut aamma ingerlatsinermut attuumassuteqartut.

Imm. 5. Innarluutilik Kalaallit Nunaanni oqartussaasut tapersersuinissamut iliuuseqarnerisigut Kalaallit Nunaata avataani inissinneqarsimappat, Inatsisartut inatsisaat manna malillugu tapersersuinermut aallartinneqartumut aningaasartuutitut atatillugu iliuuseqartussaataaneq aamma utertillugit akiliisarneq pillugit maleruagassanik erseqqinnerusunik Naalakkersuisut nunatsinni ingerlatsivinni oqartussat allat isumaqatigalugit aalajangersaasinnaapput.

Akigititanik iluarsineq

§ 92. Kommunalbestyrelsip inissiisup inuk innarluutilik § 50 naapertorlugu ulloq unnuarlu neqeroorummi najugaqarneranut ulloq unnuarlu inissiinermut aki aalajangerneqartoq akilissavaa.

Imm. 2. Ulloq unnuarlu inissiinermut akit kommunalbestyrelsip imm. 1 naapertorlugu akiligassaa imatut aalajangerneqassaaq akip akilerneqartup tamarmiusup ulloq unnuarlu neqeroorutit ingerlatsinermut aningaasartuutit matussuserneqarsinnaallutik.

Imm. 3. Akimik aalajangiineq inuk innarluutilik ulluinnarni ingerlalluarsinnaaqullugu paaqqutarineqarsinnaaqulluguluunniit, isumassorneqarsinnaaqullugu katsorsarneqarsinnaaqulluguluunniit sumiiffinni allani tunniunneqarsinnaanngitsunik ullorli unnuarlu neqeroorummi namminersorlutik oqartussanit ingerlatami taamaallaat tunniunneqarsinnaasunik immikkut pisariaqartitsisuuneranik tunngaveqassaaq, tak. § 50.

Imm. 4. Ulloq unnuarlu akigititaq, takuuk imm. 1–3, inuup innarluutillip ulloq unnuarlu neqeroorummi najugaqarneranut atatillugu aningaasartuutit tamaasa imarissavai, ilanngullugit aningaasartuutit makkununga tunngasut:

- 1) aalajangersimasumik atorfillit,
- 2) ulloq unnuarlu neqeroorummi najugaqartunut immikkut sulisuusinnaasut,
- 3) nerisaqarneq najugaqarnerlu,
- 4) meeqaamut inersimasumullu innarluutilimmut siusinaartumik, soraarnerussutisiaqanngitsumut utoqqalinersiaqanngitsumullu aningaasat kaasarfimmiussat atisarsiniutissallu
- 5) sunngiffimmi sammisassaqaqtitsinerit, aamma
- 6) Kalaallit Nunaanni avataanilu nuannaariarnerit angalanerillu.

Imm. 5. Ulloq unnuarlu neqeroorutit najugaqartuminnut Naalakkersuisut tamatumani tunniunneqartartussat aalajangersagaat ukiullu tamaasa naleqqussartagaat naapertorlugit kaasarfimmiusiaqartitsisarlutillu atisarsiniutisiassaqaqtitsisassapput. Kaasarfimmiusiassaritinneqartartussat atisarsiniutisiassaritinneqartartussallu ulloq unnuarlu akiliutitut ilaareerput.

§ 93. Akigititaq, takuuk § 92, imm. 2, ukiumoortumik januaarip aallaqqaataani aaqinneqartassaaq, aammalu aningaasanut inatsimmi atuuttumi akit akissarsiallu aaqqinnerannut akigititaq (PL-akigititaq) naapertorlugu iluarsiiiffineqartassaaq.

Imm. 2. Ulloq unnuarlu neqeroorummut nutaamik pilersinneqartumut aki aalajangersarneqartillugu kiisalu imm. 1 naapertorlugu akinik aalajangersarneqareersunik allannguisoqartillugu, Naalakkersuisut aamma kommunalbestyrelsit, imaluunniit kommunit ataatsimoorlutik sinniisaat akornanni isumaqatigiinniuteqartoqassaaq.

Imm. 3. Naalakkersuisut ulloq unnuarlu neqeroorummi najugaqarnermut aki, takuuk imm. 1, nittartakkami nalunaarutit.gl-imi Akinik allattuiffik – Isumaginninnermi akit-ni tamanut saqqummiuttassavaat, kingusinnerpaamik ukiup siuliani novembarip 15-ani, akit atuutilersinneqarnissaat sioqqullugu.

§ 94. Inatsisartut inatsisaat manna naapertorlugu akigititat aalajangersaaffigineqartut ukiumut ataasiarlutik naleqqussarneqartassapput.

Imm. 2. Akigititanik aalajangersaaneq Akigititanut quppersagaq – Isumaginninnermi akigititaani quppernermi nalunaarutit.gl-ikkut ukiup siuliani kingusinnerpaamik 15. novembari Naalakkersuisunit saqqummiunneqartarput.

Kapitali 16

Naammagittaalliorsinnaaneq aamma kisitsisitigut paasissutissat

Naammagittaalliorsinnaatitaaneq

§ 95. Kommunalbestyrelsip Inatsisartut inatsisaat una malillugu aalajangiisarneri isumaginnittoqarfiup aqunneqarnera aaqqissuussaaneralu pillugit Inatsisartut peqqussutaanni aalajangersakkat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput, taamaattoq inunnut ataasiakkaanut suliat pinnagit, takuuk § 42, imm. 1, § 43, imm. 1, § 48 aamma § 49.

Imm. 2. Innarluutilik imaluunniit taassuma suliami sinniisuutitaa, matumani § 10 malillugu, illersorti ilanngullugu, naammagittaalliummik imm. 1 malillugu suliaakkiinissaq pillugu Pissassarfimiit siunnersorneqarnissamik ilitersorneqarnissamillu qinnuteqarsinnaavoq.

Kisitsisitigut paasissutissat

§ 96. Kommunalbestyrelse kisitsisitigut paasissutissanik ukiumoortumik Naalakkersuisunit nalunaaruteqassapput, ilaatigut.

1) Inuit Inatsisartut inatsisaat manna malillugu ikiorsiissutininik pisartagaqartut amerlassusaat, ukiunut, siuaassutsinut najugaqarfinnullu agguarlugit, kiisalu tapersiissutinut aamma Kalaallit Nunaata avataani ikiorsiissutinut inissiinernullu agguarlugit.

2) Misileraalluni aaqqissuussinerit.

Imm. 2. Kommunalbestyrelsi Naalakkersuisut qinnuteqarnerisigut kisitsisitigut paasissutissanik kissaatigineqartunik nassiussinissamut pisussaaffeqarpoq.

Kapitali 17

Kinguneqartitsinerit

§ 97. Inuk innarluutilik Inatsisartut inatsisaanut matumunnga naapertorlugit tapersersorneqartoq aammalu angajoqqaatut oqartussaassuseqartoq imaluunniit akisussaaitaasoq pisussaaffeqarput kommunalbestyrelsimut paasissutissiissallutik inummut pineqartumut tunngatillugu allannguutit tamaasa pillugit, taakkua tapersersuinerimik tamakkiisumik imaluunniit ilaannakortumik allannguissamik imaluunniit atorunnaarsitsinissamik kinguneqarsinnaappata.

Imm. 2. Inuk imm. 1-imi paasissutissiisussaaitaanermik eqqortitsinngikkuni imaluunniit ilisimagaluarlugu imaluunniit ilisimassagaluarlugu pisinnaatitaaffeqanngitsumik Inatsisartut inatsisaanut matumunnga naapertorlugit tapersersorneqarsimappat, kommunalbestyrelsi tigusimasat utertillugit akilernerqarnissaat imaluunniit utertillugit tunniunneqarnissaat piumasarinnaavaa. Utertillugit akiliisitsisoqarnissaa imaluunniit utertillugit tunniussisoqarnissaa piumasarineqassappat, piumasaqaataavoq inuk innarluutilik, angajoqqaatut oqartussaassuseqartoq imaluunniit akisussaaitaasoq ilisimassagaluaraa imaluunniit ilisimassagaluaraa tapersersorneqarnissaaq pisariaarussimasooq.

Imm. 3. Uterteqqusinissaaq imaluunniit tunniusseqqinnissaaq piffissamiit innarluutillip, taassuma akisussaaitaa imaluunniit angajoqqaatut oqartussaassuseqartuata tapiissutit tunniunneqartut pisariaarussimanerannik ilisimasaqareersimanissaat piumasarineqarsinnaavoq.

§ 98. Inatsisartut inatsisaanni matumani aalajangersakkat naapertorlugit kommunalbestyrelsip oqartussatut pisussaaffimi naammassinissaat annertuumik imaluunniit arlaleriarluni sumiginnarpagu imaluunniit mianersuaalliorfigippagu, Naalakkersuisut kommunalbestyrelse pinngitsaaliissutini akilersuinissamik pisussaaffilersinnaavaa, matumani ullormut akiliisitsinerit ilanngullugit.

Imm. 2. Inatsisartut inatsisaat manna tunngavigalugu pinngitsaaliissummik akiliisinneqarnermi akiliutit Nunatta Karsianut nakkartinneqassapput.

Kapitali 18

Atuutilerfia aamma ikaarsaariarnermi aalajangersakkat

Atortuulersitsinermi, atorunnaarsitsinermi aamma ikaarsaariarnermi aalajangersakkat

§ 99. Inatsisartut inatsisaat una ullormi 1. januaari 2027-mi atuutilersinneqassaaq, taamaattoq imm. 4.

Imm. 2. Tassunga peqatigitillugu uku atorunnaarsinneqarput:

1) Inatsisartut inatsisaat nr. 13, 12. juuni 2019-imeersoq

2) Inatsisartut inatsisaat nr. 5, 19. november 2021-meersoq, innarluutilinnut tapersersuinnermut Inatsisartut inatsisaanut allannguutit pillugit.

Imm. 3. Allaffissornikkut najoqqutassat Inatsisartut inatsisaanni taaneqartumi imm. 2, nr. 1-imi tunngavilerneqarlutik aalajangersarneqartut atuukkunnaassapput, tamatumani Isumaginninnermi suliaasaqarfimmi nakkutilliisarneq pillugu Namminersorlutik Oqartussat nalunaarutaat nr. 49 ulloq 31. aggusti 2021-meersoq Inatsisartut inatsisaat una imaluunniit Inatsisartut inatsisaasa allat tunngavigalugit malittarisaliuussat naapertorlugit taarserneqarnissaa atorunnaarsinneqarnissaataluunniit tungaanut atuutiinnartussaq eqqaassanngikkaanni.

Imm. 4. Inatsisartut inatsisaanni matumani § 12 1. Januaari 2028-mi atuutilersinneqassaaq.

Namminersorlutik Oqartussat, ulloq xx. xxx 2026

Naalakkersuisut Siulittaasuat